

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं

--

कृष्ण यजुर्वेदीय तैत्तिरीय

अभिश्चवणमन्त्र पाठः

---

## **Table of Contents**

1	पुरुष सूक्तं.....	6
2	उत्तर नारायणं.....	9
3	महा नारायणं.....	10
4	ऋतं सत्यं.....	12
5	रक्षोघ्नं.....	13
6	रक्षोहणो वलगहनः.....	17
7	सोमाय पितृमते.....	18
8	उशन्तस्त्वा हवामह उशन्तः.....	20
9	भक्षोहि माऽऽविश.....	23
10	ध्रुवाऽसि धरुणाऽस्तृता.....	27
11	अग्न उदधे या त इषुः.....	30
12	शिरो वा एतद् यज्ञस्य.....	32
13	असावादित्यो ऽस्मिन् ल्लोक.....	34
14	संततिर्वा एते ग्रहाः.....	37
15	एकविंश एष भवति.....	39
16	इन्द्रो वृत्रं हत्वा.....	41
17	वैश्वदेवेन वै प्रजापतिः.....	45

---

18 अग्नये देवेभ्यः.....	50
19 उशन्तस्त्वा हवामह .....	55
20 अयं वाव यः.....	56
21 उशन् ह वै .....	59
22 त॒ ह॑तमेके.....	63
23 यां प्रथमामिष्टका.....	67
24 ऋचां प्राची.....	70

=====

---

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

अभिश्चवणमन्त्र पाठः

वेदादयः

ओं । अ॒ग्निमी॑ळे पु॒रोहि॑तं-य॒ज्ञस्य॑ दे॒वमृ॑त्विजं ।

हो॒तारं॑ रत्न॒ धात॑मं ।

इ॒षेत्वो॑र्जे॒त्वा वा॑यव॒स्स्थो पा॑यव॒स्स्थ दे॒वो व॑स्सवि॒ता प्रा॑र्पयतु  
श्रेष्ठ॑तमाय॒ कर्म॑णे ।

अ॒ग्न आ॑याहि वी॒तये॑ गृ॒णानो॑ ह॒व्यदा॑तये ।

नि॒होता॑ स॒त्वि ब॑र्हिषि ।

श॒न्नो दे॒वीर॒भिष्ट॑य॒ आपो॑ भवन्तु पी॒तये॑ ।

शं॒यो॒रभि॑ स्रवन्तुनः ॥ १

## 1 पुरुष सूक्तं

### T.A. 3-12-1

स॒हस्र॑शीर्षा॒ पुरु॑षः । स॒हस्रा॑क्षः स॒हस्र॑पात् ।  
स भूमिं॑ वि॒श्वतो॑ वृ॒त्वा । अत्य॑तिष्ठ-द॒शाङ्गु॑लं ।  
पुरु॑ष ए॒वेद॑ꣳ स॒र्वं । यद् भू॑तं यच्च॑ भ॒व्यं ।  
उता॑मृत॒त्व-स्ये॑शानः । यद॒न्नेना॑ति-रो॒हति॑ ।  
ए॒तावा॑नस्य॒ महि॑मा । अतो॑ ज्या॒याꣳश्च॑ पू॒रुषः॑ ॥ 1

### T.A. 3-12-2

पादो॑ऽस्य॒ विश्वा॑ भू॒तानि॑ । त्रि॒पाद॑स्या-मृ॒तन्दि॑वि ।  
त्रि॒पादू॑र्ध्व उदै॑त् पुरु॑षः । पादो॑ऽस्ये॒हा ऽऽभ॑वात्पुनः ।  
ततो॑ वि॒ष्वङ् व्य॑क्रामत् । सा॒शना॑न॒शने॑ अ॒भि ।  
तस्मा॑द् वि॒राड् जा॑यत । वि॒राजो॑ अ॒धि पू॒रुषः॑ ।  
स जा॑तो अत्य॑रिच्यत । प॒श्चाद् भूमि॑मथो॒ पुरः॑ ॥ 2

### T.A. 3-12-3

यत् पुरु॑षेण॒ हवि॑षा । दे॒वा य॑ज्ञम॒तन्व॑त ।  
वस॑न्तो अस्या-सी॒दाज्यं॑ । ग्री॒ष्म इ॒द्ध्म-इ॒शर॑द्ध॒विः ।

सप्तास्यासन् परिधयः । त्रिस्सप्त समिधः कृताः ।  
दे॒वा यद् य॒ज्ञं-तन्वा॒नाः । अब॑द्धन् पु॒रुषं॑ प॒शुं ।  
तं य॒ज्ञं ब॒र्हिषि॑ प्रौक्षन् । पु॒रुषं॑ जा॒तम॑ग्रतः ॥ 3

**T.A. 3-12-4**

तेन॑ दे॒वा अ॒यज॑न्त । सा॒द्ध्य॒या ऋ॒षय॑श्च ये ।  
तस्मा॑द्य॒ज्ञाथ् सर्व॑हुतः । संभृ॑तं पृष॒दाज्यं॑ ।  
प॒शूँ॒स्ताँश्च॑ के वा॒यव्यान्॑ । आ॒र॒ण्यान्-ग्रा॒म्याश्च॑ ये ।  
तस्मा॑द्य॒ज्ञाथ् सर्व॑हुतः । ऋ॒चः सा॒मानि॑ ज॒ज्ञिरे॑ ।  
छन्दा॑ँ॒सि ज॒ज्ञिरे॑ तस्मा॑त् । य॒जुस्त॑स्मा दजा॒यत॑ ॥ 4

**T.A. 3-12-5**

तस्मा॑दश्वा अजा॒यन्त॑ । ये के॑ चो॒भया॑दतः ।  
गा॒वो ह ज॒ज्ञिरे॑ तस्मा॑त् । तस्मा॑ज्जा॒ता अजा॑वयः ।  
यत्पु॑रुषं व्य॒दधुः॑ । क॒ति॒धा व्य॑कल्पयन् ।  
मु॒खं कि॑मस्य कौ बा॒हू । का॒वू॒रू पा॑दावुच्येते ।  
ब्रा॒ह्म॒णो॒स्य मु॒खमा॑सीत् । बा॒हू रा॑ज॒न्यः कृ॒तः ॥ 5

**T.A. 3-12-6**

ऊ॒रू तद॑स्य॒ यद्वै॑श्यः । प॒द्भ्या॑ꣳ शू॒द्रो अ॑जायतः ।  
 च॒न्द्रमा॑ मन॒सो जा॑तः । चक्षो॑-स्सू॒र्यो अ॑जायत ।  
 मु॒खादिन्द्र॑-श्चा॒ग्निश्च॑ । प्रा॒णाद् वा॒यु-र॑जायत ।  
 नाभ्या॑ आसीद॒न्तरि॑क्षं । शी॒र्ष्णो द्यौः॑ स॒मव॑र्त्तत ।  
 प॒द्भ्यां भूमि॑ दि॒शः श्रो॑त्रात् । तथा॑ लो॒काꣳ अ॑कल्पयन् ॥ 6

**T.A. 3-12-7**

वे॒दाह॑मेतं॒ पुरु॑षं॒ म॒हान्तं॑ ॥ आ॒दि॒त्यव॑र्णं॒ तम॑सस्तु पा॒रे ।  
 सर्वा॑णि रू॒पाणि॑ वि॒चित्य॑ धी॒रः । ना॒मानि॑ कृ॒त्वाभि॑वदन्॒ यदा॑स्ते ॥  
 धा॒ता पु॒रस्ता॑द्यमु॒दा ज॒हार॑ । श॒क्रः प्र॒विद्वान् प्र॒दिश॑श्चत॒स्रः ।  
 तमे॒वं वि॑द्वानमृ॒त इ॒ह भ॑वति । नान्यः पन्था॑ अ॒यना॑य विद्यते ।  
 यज्ञे॑न य॒ज्ञ-म॑यजन्त दे॒वाः । तानि॑ धर्मा॑णि प्रथ॒मान्या॑सन् ( ) ।  
 ते ह॒ नाकं॑ म॒हिमा॑नस्सचन्ते । यत्र॑ पूर्वे॑ सा॒ध्या-स्सन्ति॑ दे॒वाः ॥ 7  
 (पू॒रुषः - पु॒रो - ऽग्र॑तो - ऽजा॑यत - कृ॒तो - ऽक॑ल्पय -  
 न्ना॒सन् द्वे च॑)



## 2 उत्तर नारायणं

### T.A. 3-13-1

अ॒द्भ्यस्सं॑भू॒तः पृ॒थि॒व्यै रसा॑च्च । वि॒श्वक॑र्मणः॒ सम॑वर्तताधि ।  
तस्य॑ त्वष्टा॒ विद॑धद्रूपमेति । तत्पु॑रुषस्य॒ विश्व॑ मा॒जान॑मग्रे ॥  
वेदा॑हमेतं॒ पुरु॑षं॒ महान्तं॑ । आ॒दि॒त्य वर्णं॑ तम॒सः पर॑स्तात् ।  
तमे॒वं वि॒द्वान॑मृत॒ इह॑ भवति । नान्यः॑ पन्था॒ विद्य॑तेऽय॒नाय॑ ॥  
प्र॒जाप॑तिश्चरति॒ गर्भे॑ अ॒न्तः । अ॒जाय॑मानो बहु॒धा विजा॑यते । 8

### T.A. 3-13-2

तस्य॑ धीराः॒ परि॑जानन्ति॒ योनिं॑ । मरी॑चीनां॒ पद॑मिच्छन्ति वे॒धसः॑ ॥  
यो दे॒वेभ्य॑ आ॒तप॑ति । यो दे॒वानां॑ पु॒रोहि॑तः ।  
पूर्वो॑ यो दे॒वेभ्यो॑ जा॒तः । नमो॑ रु॒चाय॑ ब्रा॒ह्मये॑ ॥  
रुचं॑ ब्रा॒ह्मज्ज॑नयन्तः । दे॒वा अग्रे॑ तदब्रुवन् ।  
यस्त्वै॒वं ब्रा॒ह्म॒णो वि॒द्यात् । तस्य॑ दे॒वा अस॑न्वशे ( ) ॥  
ह्रीश्च॑ ते लक्ष्मीश्च॒ पत्न्यौ॑ । अ॒हो॒रा॒त्रे पा॒र्श्वे ।

नक्षत्राणि रूपं । अश्चिनौ व्यात्तं ।

इष्टं मनिषाण । अमुं मनिषाण । सर्वं मनिषाण ॥ 9

(जायते – वश सप्त च)

### 3 महा नारायणं

(TA 6.11.1)

सहस्रशीर्षं देवं विश्वाक्षं विश्वशं भुवं ।

विश्वं नारायणं देवमक्षरं परमं पदं ॥

विश्वतः परमान्नित्यं विश्वं नारायणं हरिं ।

विश्वमेवेदं पुरुष स्तद्विश्व-मुपजीवति ॥

पतिं विश्वस्यात्मेश्वरं शाश्वतं शिवमच्युतं ।

नारायणं महाज्ञेयं विश्वात्मानं परायणं ॥

नारायण परो ज्योतिरात्मा नारायणः परः ॥

नारायण परं ब्रह्म तत्त्वं नारायणः परः ।

नारायण परो ध्याता ध्यानं नारायणः परः ।

यच्च किञ्चिज्-जगत्सर्वं दृश्यते श्रूयतेऽपि वा ।

अन्तर् बहिश्च तथ् सर्वं व्याप्य नारायणः स्थितः ॥ 10

(TA 6.11.2)

अनन्त मव्ययं कविः समुद्रेऽन्तं विश्वशंभुवं ।

पद्मकोश-प्रतीकाशः हृदयं चाप्यधोमुखं ॥

अधो निष्ठ्या वितस्त्यान्ते नाभ्यामुपरि तिष्ठति ।

ज्वालमालाकुलं भाती विश्वस्यायतनं महत् ॥

सन्ततः शिलाभिस्तु लंबत्या कोशसन्निभं ।

तस्यान्ते सुषिरः सूक्ष्मं तस्मिन् सर्वं प्रतिष्ठितं ॥

तस्य मध्ये महानग्निर् विश्वार्चिर् विश्वतो मुखः ।

सोऽग्रभुग् विभजन् तिष्ठन्नाहार-मजरः कविः ॥

तिर्यगूर्ध्व मधश्शायी रश्मयस्तस्य सन्तता ।

सन्तापयति स्वं देहमापादतल मस्तकः ।

तस्य मध्ये वह्नि शिखा अणीयोर्ध्वा व्यवस्थितः ( ) ॥

नी॒लतो॑ यद॑ म॒ध्यस्थाद् वि॒द्युल्ले॑खेव॒ भास्व॑रा ।  
नी॒वार॑ शू॒कव॑त्तन्वी पी॒ता भा॑स्वत्य॒णूप॑मा ॥  
तस्याः॑ शि॒खाया॑ म॒ध्ये पर॑मा॒त्मा व्य॑वस्थि॒तः ।  
स ब्र॑ह्म स शि॒वः स हरिः॑ सेन्द्रः॑ सोऽक्षरः॑ पर॒मः स्व॑राट् ॥ 11  
(ना॒राय॑णः स्थि॒तो – व्य॑वस्थि॒तश्च॑त्वारि॒ च)

#### 4 ऋत॑ꣳ सत्यं

**(T.A.6.12.1)**

ऋत॑ꣳ सत्यं॑ परं॑ ब्र॒ह्म पु॒रुषं॑ कृ॒ष्ण पि॒ङ्गलं॑ ।  
ऊ॒र्ध्वरे॑तं वि॒रूपाक्षं॑ वि॒श्वरू॑पाय॒ वै नमो॑ नमः॑ ॥ 12a

**(T.A.6.1.6)**

ना॒राय॑णाय॒ विद्महे॑ वा॒सुदे॑वाय॒ धीमहि॑ ।  
तन्नो॑ वि॒ष्णुः प्र॑चो॒दयात् ॥ 12b

**(T.S.1.2.23)**

वि॒ष्णो॒र्नु॒कं॑ वी॒र्या॑णि प्र॒वोचं॑ यः पा॒र्त्थि॒वानि॑ वि॒ममे॑ रा॒जा॒ऽसि॑  
यो अ॒स्क॒भाय॑-दु॒त्तर॑ऽ स॒धस्थं॑ वि॒चक्र॑माण-स्त्रे॒धोरु॑गा॒यो  
वि॒ष्णो-र॑रा॒टम॑सि वि॒ष्णोः॑ पृ॒ष्ठम॑सि वि॒ष्णो-इ॒न॒प्त्रे॒स्थो॑ वि॒ष्णो  
-स्स्यूर॑सि वि॒ष्णोर् ध्रु॒वम॑सि वै॒ष्णव॑म॒सि वि॒ष्णवे॑ त्वा ॥ 12c

**5 रक्षोघ्नं**

**(T.S. 1-2-14-1)**

कृ॒णु॒ष्व पा॒जः प्र॑सि॒तिन्न॑ पृ॒थ्वीं॑ या॒हि रा॒जे वा॑म॒वा॒ऽ इ॒भे न॑ ।  
वृ॒ष्वीम॑नु प्र॒सितिं॑-दू॒णानो॑ऽस्ताऽसि वि॒ध्य र॒क्षस॑ स्त॒पिष्ठैः॑ ।  
तव॑भ्रमा॒स आ॒शुया॑ प॒तंत्य॑नु स्पृ॒श-धृ॑ष॒ता शो॑शु॒चानः॑ ।  
तपू॑ऽष्य॒ग्ने जु॒ह्वाप॑तं-गा॒नस॑न्दि॒तो वि॒सृज॑ वि॒ष्व गु॒ल्काः॑ ।  
प्र॒तिस्प॑शो वि॒सृज॑-तू॒र्णि तमो॑ भ॒वा पा॒युर्वि॑शो अ॒स्या अ॑द॒ब्धः ।  
यो नो॑ दू॒रे अ॒घश॑ऽसो, [ ] 13

**(T.S. 1-2-14-2)**

यो॑ अ॒न्त्य॒ग्ने॒ मा॒कि॒ष्टे॒ व्य॒थि॒रा द॒ध॒र्षी॑त् ।  
उ॒द॒ग्ने॒ति॒ष्ठ॒ प्र॒त्या त॒नु॒ष्व॒न्य-मि॒त्रा॒ औ॒ष॒ता-त्ति॒ग्म॒हे॒ते ।  
यो॑ नो॒ अ॒रा॒ति॒ समि॒धान॒ च॒क्रे॒ नी॒चा॒त॒ध॒क्ष्य॒त स॒न्न शु॒ष्कं॑ ।  
ऊ॒र्ध्वो॑ भ॒व प्र॒ति॒वि॒ध्या-ध्य॒स्म॒दा वि॒ष्कृ॑णुष्व॒ दै॒व्या॒न्य॒ग्ने ।  
अ॒व॒स्थि॒रा त॒नु॒हि या॒तु जू॒नां जा॒मि॒म॒जा॒मिं प्र॒मृ॑णीहि॒ श॒त्रून् ।  
स ते, [ ] 14

**(T.S. 1-2-14-3)**

जा॒ना॒ति सु॒म॒तिं य॑वि॒ष्ठय॒ ई॒व॒ते ब्र॒ह्म॒णे गा॒तु॒मै॒रत् ।  
वि॒श्वा॒न्य॒स्मै सु॒दि॒ना॒नि रा॒यो द्यु॒म्ना॒न्य॒र्यो वि॒दु॒रो अ॒भि॒द्यौ॑त् ।  
से॒द॒ग्ने अ॒स्तु सु॒भ॒ग स्सु॒दा॒नु-र्य॑स्त्वा॒ नित्ये॑न॒ ह॒वि॒षाय॒ उ॒क्थैः॑ ।  
पि॒प्री॑ष॒ति॒स्व आ॒यु॒षि दु॒रो॒णे वि॒श्वे॑द॒स्मै सु॒दि॒ना-सा॒ऽस॒दि॒ष्टिः॑ ।  
अ॒र्चा॒मि ते॒ सु॒म॒तिं घो॒ष्य॒र्वा॒ख्-स्स॒न्ते वा॒ वा ता॑ ज॒र॒ता, [ ] 15

**(T.S. 1-2-14-4)**

मि॒यं॒गीः ।स्व॑श्वा॒स्त्वा सु॒र॒था म॒र्ज॒ये-मा॒स्मै क्ष॒त्रा॒णि धा॒र॒ये॒र-नु॒द्यून् ।  
इ॒ह॒त्वा भू॒र्या॑च॒रे दु॒प॒त्म॒न्-दो॒षा॒व॒स्त दी॒दि॒वा॒ सम॒नु॒द्यून् ।

क्री॒डन्त॑स्त्वा सु॒मन॑सस्सपे॒माभि॑ द्यु॒म्ना त॑स्थि॒वाꣳ सौ॑जनानां ।  
यस्त्वा-स्व॑श्चस्सु-हिर॑ण्यो अ॒ग्न उप॑याति वसु॒मता॑ रथे॒न ।  
तस्य॑ त्रा॒ता-भव॑सि तस्य॑ सखा॒ यस्त आ॑तिथ्य मानु॒षग् जु॑र्जोषत् ।  
महो॑रुजामि, [ ] 16

**(T.S. 1-2-14-5)**

बन्धु॑ता वचो॑भिस्तन्मा॒ पितु॑र्गो॒तमाद॑-न्वियाय ।  
त्वन्नो॑ अ॒स्य वच॑स-श्चिकि॒द्धि हो॑तर्यविष्ट सु॒क्रतो॑ दमू॒नाः ।  
अस्व॑प्न जस्तर॑णय स्सु॒शेवा॑ अतन्द्रा॒सोऽवृ॑का अश्र॑मिष्ठाः ।  
तेपा॑यवः स॒ध्रिय॑ञ्चो निष॒द्याग्ने॑ तव॒नः पान्त्व॑मूर ।  
ये पा॑यवो॒ मामते॑यन्ते अ॒ग्ने पश्य॑न्तो अ॒न्धं दु॑रिताद र॒क्षन् ।  
र॒क्ष॒तान्त् सु॒क्रतो॑ वि॒श्ववे॑दा दि॒प्सन्त इ॒द्रिप॑वो॒ ना ह॑, [ ] 17

**(T.S. 1-2-14-6)**

दे॒भुः । त्वया॑ वयꣳ स॒धन्य॑-स्त्वो-तास्तव प्र॒णीत्य॑ श्याम॒ वाजा॑न् ।  
उ॒भा शꣳ सा॑ सूदय सत्यता॒ते-ऽनु॑ष्ठुया कृ॒णु॒ह्य-ह॑याण ।

अ॒या ते॑ अ॒ग्ने स॒मिधा॑ वि॒धेम॒ प्रति॒स्तोम॑ꣳ श॒स्य॒मानं॑ गृ॒भाय॑ ।  
दहा॒शसो॑ र॒क्षसः॑ पा॒ह्यस्मान् दृ॒हो नि॒दो मि॒त्रम॒हो अ॒व॒घात् ।

**(T.S. 1-2-14-7)**

र॒क्षो॒हणं॑ वा॒जिन॒माजि॑ घ॒र्मि मि॒त्रं प्र॒थिष्ठ॑-मु॒पया॑मि श॒र्म ।  
शि॒शानो॑ अ॒ग्निः क्र॒तुभि॑-स्स॒मिद्ध॑-स्स॒नो दि॒वा, ( ) [ ] 18

स॒रिषः॑ पा॒तुन॑क्तं ॥ वि॒ज्योति॑षा बृ॒हता॑ भा॒त्यग्नि॑रा॒वि-वि॒श्वानि॑ कृ॒णुते॑  
म॒हित्वा॑ । प्रा॒दे॒वी-मा॒या स्स॑ह॒ते-दु॒रे॒वा शि॑शी॒ते शृ॑ंगे र॒क्षसे॑ वि॒निक्षे॑ ॥  
उ॒त स्वा॒नासो॑ दि॒विष॑न्त्व॒ग्ने स्ति॒ग्मायु॑धा र॒क्षसे॑ ह॒न्त वा॑ उ ।  
म॒दे॒चिद॑स्य प्ररु॒जन्ति॑ भा॒मा न॒वर॑न्ते प॒रिबा॑धो अ॒दे॒वीः ॥ 19

(अ॒घश॑ꣳसः - स ते - ज॒रता॑ꣳ - रु॒जामि॑ -  
ह - दि॒वै - क॑च॒त्वारि॑ꣳश॒च्च)



## अभिश्चवणमन्त्र जपारंभः

### 6 रक्षोहणो वलगहनः

#### T.S. 1.3.2.1

रक्षो॑ह॒णो॑ व॒लग॒ह॒नो॑ वै॒ष्ण॒वा॒न् ख॒ना॒मी-द॒म॒हं॑ तं व॒लग॒-मु॒द्व॒पा॒मि॒  
यं नः॑ स॒मा॒नो॑ य॒मस॒मा॒नो॑ नि॒च॒खा॒ने॒द॒मे॒न॒म॒ध॒रं॑ क॒रो॒मि॒ यो नः॑ स॒मा॒नो॑  
योऽ॑ स॒मा॒नो॑ ऽरा॒ती॒य॒ति॑ गा॒य॒त्रे॒ण छ॒न्द॒सा ऽव॒बा॒ढो॑ व॒लगः॑ कि॒म॒त्र भ॒द्रं  
त॒न्नौ॑ स॒ह वि॒रा॒ड॒सि॑ स॒प॒त्न॒हा स॒म्रा॒ड॒सि॑ भ्रा॒तृ॒व्य॒हा स्व॒रा॒ड॒स्य॒भि-  
मा॒ति॒हा वि॒श्वा॒रा॒ड॒सि॑ वि॒श्वा॒सां ना॒ष्ट्रा॒णां॑ ह॒न्ता, [ ] 20

#### T.S. 1.3.2.2

रक्षो॑ह॒णो॑ व॒लग॒ह॒नः॑ प्रो॒क्षामि॑ वै॒ष्ण॒वा॒न्,  
रक्षो॑ह॒णो॑ व॒लग॒ह॒नो॑ऽव॒ न॒यामि॑ वै॒ष्ण॒वा॒न्,  
य॒वो॑ऽसि॑ य॒व॒या॒स्मद् द्वे॒षो॑ य॒व॒या॒रा॒ती,  
रक्षो॑ह॒णो॑ व॒लग॒ह॒नो॑ऽव॒ स्तृ॒णामि॑ वै॒ष्ण॒वा॒न्,  
रक्षो॑ह॒णो॑ व॒लग॒ह॒नो॑ऽभि॑ जु॒हो॒मि॑ वै॒ष्ण॒वा॒न्,  
रक्षो॑ह॒णो॑ व॒लग॒ह॒ना॒वु॒प द॒धामि॑ वै॒ष्ण॒वी ,

र॒क्षो॒ह॒णौ॑ व॒लग॒हनौ॑ प॒र्यू॒हामि॑ वै॒ष्ण॒वी ,  
र॒क्षो॒ह॒णौ॑ व॒लग॒हनौ॑ प॒रि स्तृ॑णामि वै॒ष्ण॒वी,  
र॒क्षो॒ह॒णौ॑ व॒लग॒हनौ॑ वै॒ष्ण॒वी ,  
बृ॒ह॒न्न॒सि॑ बृ॒ह॒द्ग्रा॒वा बृ॒ह॒ती-मि॒न्द्राय॑ ( ) वा॒चं व॑द ॥ 21  
(ह॒न्ते - न्द्राय॑ द्वे च)

## 7 सोमाय पितृमते

### T.S. 1.8.5.1

सो॒माय॑ पि॒तृम॑ते पु॒रो॒डा॒शं॑ ष॒ट्क॑पालं निर्व॑पति पि॒तृभ्यो॑ ब॒र्हि॒षद्भ्यो॑  
धा॒नाः पि॒तृभ्यो॑ ऽग्नि॒ष्वा॒त्तेभ्यो॑ ऽभि॒वा॒न्या॒यै दु॒ग्धे म॒न्थ-मे॒त॒ते त॒त ये  
च त्वा-म॒न्वे-त॑ते पि॒ताम॑ह प्र॒पि॒ताम॑ह ये च त्वा-म॒न्व॒त्र पि॒त॒रो  
य॒थाभा॑गं म॒न्दध्वं॑ सु॒सं॒दृ॒शं त्वा व॒यं म॒घ॒वन् म॒न्दि॒षीम॑हि ।  
प्र नू॒नं पू॒र्ण॒व॒न्धु॒रः स्तु॒तो या॑सि व॒शां॑ अनु ।  
यो॒जा-न्वि॑न्द्र ते ह॒री ॥ 22

**T.S. 1.8.5.2.**

अक्ष॑न्न-मी॑मद॒न्त ह्य॑व प्रि॒या अधू॑षत ।  
अस्तो॑षत स्व॒भान॑वो वि॒प्रा न॑वि॒ष्ठया म॒ती । योजा॑न् वि॒न्द्र ते ह॒री ॥  
अक्ष॑न् पि॒तरो ऽमी॑मद॒न्त पि॒तरो ऽती॑तृप॒न्त पि॒तरो ऽमी॑मृज॒न्त पि॒तरः॑ ।  
परे॑त पि॒तरः सो॒म्या गं॒भीरैः प॒थिभिः॑ पू॒र्व्यैः ।  
अथा॑ पि॒तृन् थ्सु॑वि॒दत्रा॑ अपी॒त यमे॑न ये स॒धमा॑दं म॒दन्ति॑ ।  
मनो॑ न्वा हु॒वामहे॑ ना॒राश॑से॒न स्तोमे॑न पि॒तृणां॑ च म॒न्मभिः॑ ।

आ, ( ) [ ] 23

**T.S. 1.8.5.3.**

न ए॒तु मनः॑ पु॒नः क्र॒त्वे द॒क्षाय॑ जी॒वसे॑ ॥ ज्योक् च सूर्यं॑ दृ॒शे ।  
पु॒नर्नः॑ पि॒तरो॑ मनो॒ ददा॑तु दै॒व्यो जनः॑ । जी॒वं व्रा॑त॒ सचे॑महि ।  
यद॒न्तरि॑क्षं पृ॒थि॒वी-मु॒त द्यां॑ य॒न्मा॒तरं॑ पि॒तरं॑ वा जि॒हिस्मि॑ ।  
अ॒ग्नि॒र्मा तस्मा॑-दे॒नसो॑ गा॒र्हप॑त्यः प्र मुञ्च॑तु दु॒रिता॑ या॒नि  
चकृ॑म करो॒तु मा-म॑ने॒नसं॑ ॥ 24

(हरी - मन्मभिरा - चतुश्चत्वारिंशच्च)

**8 उशन्तस्त्वा हवामह उशन्तः**

**T.S. 2.6.12.1.**

उ॒शन्त॑स्त्वा ह॒वाम॑ह उ॒शन्तः॑ समि॒धीम॑हि ।

उ॒शन्नु॑शत आ वह॑ पि॒तृन् ह॒विषे॑ अ॒त्तवे॑ ।

त्वञ् सोम॑ प्रचि॒कितो॑ मनी॒षा त्वञ् रजि॑ष्ठ-मनु॑ नेषि॒ पन्थां॑ ।

तव॑ प्रणी॒ती पि॒तरो॑ न इ॒न्दो दे॒वेषु॑ रत्न॑-मभजन्त॒ धीराः॑ ।

त्वया॑ हि नः॑ पि॒तरः॑ सोम॒ पूर्वे॑ कर्मा॒णि च॒क्रुः प॑वमान॒ धीराः॑ ।

व॒न्वन्न॑वातः परि॒धीञ्-र॒पोर्णु॑ वी॒रेभि॑-रश्चै॒-र्म॒घवा॑ भवा, [ ] 25

**T.S. 2.6.12.2.**

नः । त्वञ् सोम॑ पि॒तृभिः॑ सँवि॒दानो॑ ऽनु॒ द्यावा॑पृथि॒वी आ त॑तन्थ ।

तस्मै॑ त इ॒न्दो ह॒विषा॑ वि॒धेम॑ वयञ् स्याम॒ पत॑यो रयी॒णां ।

अग्नि॑ष्वात्ताः पि॒तर ए॒ह ग॑च्छत॒ सदः॑ सदः॑ सदत॒ सुप्र॑णीतयः ।

अ॒त्ता ह॒वीञ्षि॑ प्रय॒तानि॑ बर्हि॒ष्यथा॑ रयिञ् सर्व॑वीरं दधातन ।

बर्हि॑षदः पि॒तर ऊ॒त्यर्वा॑गिमा वो ह॒व्या च॑कृमा जुष॒ध्वं॑ ।

त आ ग॒ताव॑सा॒ श॒न्त॑मे॒नाथा॑स्मभ्य॒, [ ] 26

**T.S. 2.6.12.3.**

शं यो॑-र॒रपो॑ द॒धात॑ ।

आऽहं॑ पि॒तृन्त् सु॑विद॒न्ना॒ अ॒वि॒त्सि॑ न॒पातं॑ च वि॒क्रम॑णं च वि॒ष्णोः॑ ।

ब॒र्हि॒षदो॑ ये स्व॒धया॑ सु॒तस्य॑ भ॒जन्त॑ पि॒त्वस्त॑ इ॒हाग॑मि॒ष्टाः ।

उप॑हू॒ताः पि॒तरः॑ सो॒म्यासो॑ ब॒र्हिष्ये॑षु नि॒धिषु॑ प्रि॒येषु॑ ।

त आ ग॑मन्तु॒ त इ॒ह श्रु॑वन्त्व॒धि ब्रु॑वन्तु॒ ते अ॑वन्त्व॒स्मान् ।

उदी॑रता॒मवर॑ उत्प॒रास॑ उन्म॒ध्यमाः॑ पि॒तरः॑ सो॒म्यासः॑ ।

असु॑, [ ] 27

**T.S. 2.6.12.4.**

यै॑ ई॒युर॑वृ॒का ऋ॑त॒ज्ञास्तो॑ नोऽव॑न्तु पि॒तरो॑ ह॒वेषु॑ ।

इ॒दं पि॒तृभ्यो॑ नमो॑ अ॒स्त्वद्य॑ ये पू॒र्वासो॑ य उप॒रास॑ ई॒युः ।

ये पा॒र्त्थि॒वे र॒जस्या॑ निष॒त्ता ये वा॑ नू॒न सु॑वृ॒जना॑सु वि॒क्षु ।

अ॒धा यथा॑ नः पि॒तरः॑ प॒रासः॑ प्र॒त्नासो॑ अ॒ग्न ऋ॑त-मा॒शुषा॑णाः ।

शु॒चीद॒यन् दी॒धिति॑-मु॒क्थशा॒सः क्षा॒मा भि॒न्दन्तो॑ अरु॒णीर॑प॒ व्रन् ।

यद॒ग्ने, [ ] 28

**T.S. 2.6.12.5.**

क॒व्यवा॒हन॒ पित॑तृन् यक्ष्य॒तावृ॑धः ।

प्र च॑ ह॒व्यानि॑ वक्ष्य॒सि दे॒वेभ्य॑श्च॒ पितृ॑भ्य॒ आ ।

त्वम॒ग्न ई॒डितो॑ जा॒तवे॒दो ऽवा॑ङ्म॒व्यानि॑ सु॒रभी॑णि कृ॒त्वा ।

प्रा॒दाः पितृ॑भ्यः स्व॒धया॒ ते अ॑क्ष॒न्नद्धि॒ त्वं दे॒व प्र॑य॒ता ह॒वीष्णि॑ ।

मा॒तली॑ क॒व्यैर्य॑मो अ॒ङ्गिरो॑भिर् बृ॒हस्प॑तिर्. ऋ॒क्वभि॑र् वावृ॒धानः॑ ।

या॒श्च दे॒वा वावृ॑धुर्ये च दे॒वान्थ् स्वा॒हाऽन्ये॑ स्व॒धयाऽन्ये॑ म॒दन्ति॑ ॥ 29

**T.S. 2.6.12.6.**

इ॒मं य॑म प्र॒स्तर॑मा हि सी॒दाङ्गि॑रोभिः पितृ॒भिः सँ॑वि॒दानः॑ ।

आ त्वा॒ मन्त्राः॑ क॒विश॑स्ता व॒हन्त्वे॒ना रा॑जन्. ह॒विषा॑ मा॒दय॑स्व ।

अ॒ङ्गिरो॑भिरा ग॒हि य॒ज्ञिये॑भिर्य॒म वैरू॑पै-रि॒ह मा॑दयस्व ।

वि॒वस्व॑न्त॒ हुवे॑ यः पि॒ता ते॒ऽस्मिन्. य॒ज्ञे ब॒र्हिष्या॑ निष॒द्य ।

अङ्गिरसो॑ नः पि॒तरो॑ नव॒ग्वा अथ॑र्वा॒णो भृ॑गवः सो॒म्यासः॑ ।  
 तेषां॑ वय॑ꣳ सु॒मतौ॑ यज्ञि॒याना॑-मपि॑ भ॒द्रे सौ॑मनसे ( ) स्या॑म ॥ 30  
 (भवा॑ - स्मभ्य॑ - मसुं॑ - यद॑ग्ने - मद॑न्ति - सौम॑नस एकं॑ च)

### 9 भक्षेहि माऽऽविश

#### T.S. 3.2.5.1.

भक्षे॑हि माऽऽवि॑श दी॒र्घायु॑त्वाय॑ श॒न्तनु॑त्वाय॑ रा॒यस्पोषा॑य॒ वर्च॑से  
 सु॒प्रजा॑-स्त्वाये॑हि वसो॑ पु॒रोवसो॑ प्रि॒यो मे॑ हृदो॑ ऽस्य॒श्चिनो॑स्त्वा  
 बा॒हुभ्या॑ꣳ स॒ध्यासं॑ नृ॒चक्ष॑सं त्वा दे॒व सोम॑ सु॒चक्षा॑ अव  
 ख्ये॑षं म॒न्द्राऽभि॑भूतिः के॒तु र्य॒ज्ञानां॑ वा॒ग्जुषा॑णा सोम॑स्य  
 तृ॒प्यतु॑ म॒न्द्रा स्व॑र्वा॒च्य-दि॑ति-र॒नाहत॑ शी॒र्ष्णी वा॒ग्जुषा॑णा  
 सोम॑स्य तृ॒प्यत्वे॑हि वि॒श्वच॑षर्णे, [ ] 31

#### T.S. 3.2.5.2.

शं॒भूर् मयो॑भूः स्व॒स्ति मा॑ हरि॒वर्ण॑ प्र च॒र क्र॑त्वे दक्षाय॑ रा॒यस्पोषा॑य  
 सु॒वीर॑तायै॒ मा मा॑ रा॒जन्वि॑ बी॒भिषो॑ मा मे॒ हार्दि॑ त्विषा॑ व॒धीः ।  
 वृष॑णे शु॒ष्माया॑ऽयुषे॒ वर्च॑से । वसु॑मद्गणस्य सोम॑ दे॒व ते म॑तिवि॒दः

प्रातःसवनस्य गायत्रछन्दस इन्द्रपीतस्य नराशंसपीतस्य  
पितृपीतस्य मधुमत उपहूतस्योपहूतो भक्षयामि रुद्रवद्गणस्य  
सोम देव ते मतिविदो माद्ध्यन्दिनस्य सवनस्य  
त्रिष्टुप्छन्दस इन्द्रपीतस्य नराशंसपीतस्य, [ ] 32

**T.S. 3.2.5.3.**

पितृपीतस्य मधुमत उपहूतस्योपहूतो भक्षया-म्यादित्यवद्गणस्य  
सोम देव ते मतिविदस्तृतीयस्य सवनस्य जगतीछन्दस इन्द्रपीतस्य  
नराशंसपीतस्य पितृपीतस्य मधुमत उपहूतस्योपहूतो भक्षयामि ।  
आ प्यायस्व समेतु ते विश्वतः सोम वृष्णियं ।  
भवा वाजस्य संगथे । हिन्व मे गात्रा हरिवो गणान् मे मा  
वि तीतृषः । शिवो मे सप्तरूषीनुप तिष्ठस्व मा  
मेऽवाङ्नाभिमति, [ ] 33

**T.S. 3.2.5.4.**

गाः । अपाम सोम-ममृता अभूमादर्शम ज्योति-रविदाम देवान् ।  
किमस्मान् कृणव-दरातिः किमु धूर्ति-रमृत मर्त्यस्य ।



यन्म आ॒त्मनो॑ मि॒न्दाऽभू॑दग्निस्तत् पुन॒-राहा॑र्जातवे॒दा वि॒चर्ष॑णिः ।

पुन॒-रग्निश्चक्षु॑-रदा॒त् पुन॒रिन्द्रो॑ बृह॒स्पतिः॑ ।

पुन॑र्मे अ॒श्विना यु॒वं चक्षु॑रा ध॒त्त-म॒क्ष्योः ।

इ॒ष्टय॑जुषस्तो दे॒व सोम॑ स्तु॒तस्तो॑मस्य, [ ] 34

**T.S. 3.2.5.5.**

श॒स्तोक्थ॑स्य ह॒रिव॑त इन्द्र॒पीत॑स्य म॒धुम॑त उप॒हूत॑स्योप॒हूतो॑

भक्ष॑यामि । आ॒पूर्याः॒ स्था मा॑ पू॒रय॑त प्र॒जया॑ च ध॒नेन॑ च ।

ए॒तत्ते॑ त॒त ये च॒ त्वा-म॒न्वे॒तत्ते॑ पि॒ताम॑ह प्र॒पिता॑मह॒ ये च॒ त्वाम॑न्व॒त्र

पि॒तरो॑ यथाभा॒गं म॑न्दध्वं॒ नमो॑ वः पि॒तरो॑ र॒साय॑ नमो॑ वः पि॒तरः॑

शु॒ष्माय॑ नमो॑ वः पि॒तरो॑ जी॒वाय॑ नमो॑ वः पि॒तरः॑, [ ] 35

**T.S. 3.2.5.6.**

स्व॒धायै॑ नमो॑ वः पि॒तरो॑ म॒न्यवे॑ नमो॑ वः पि॒तरो॑ घो॒राय॑ पि॒तरो॑ नमो॑

वो॒ य ए॒तस्मिन्॑ लो॒के स्थ॑ यु॒ष्माऽस्ते॑ऽनु॒ ये ऽस्मिन्॑ लो॒के मां॑

ते॑ऽनु॒ य ए॒तस्मिन्॑ लो॒के स्थ॑ यू॒यं तेषां॑ व॒सि॑ष्ठा भू॒यास्त॑ ये ऽस्मिन्॑

लो॒केऽहं॑ ते॒षां व॑सि॒ष्ठो भू॒यासं॑ प्र॒जाप॑ते न त्वदे॒तान्य॒न्यो वि॒श्वा  
जा॒तानि॒ परि॒ ता ब॑भूव ( ) ॥ 36

**T.S. 3.2.5.7.**

यत्का॒मास्ते॑ जुहु॒मस्तन्नो॑ अस्तु वय॑ꣳ स्या॒म प॑तयो रयी॒णां ।  
दे॒वकृ॑त॒स्यैन॑सो ऽव॒यज॑नमसि मनु॒ष्यकृ॑त॒स्यैन॑सो ऽव॒यज॑नमसि  
पि॒तृकृ॑त॒स्यैन॑सो ऽव॒यज॑नमस्यप्सु धौ॒तस्य॑ सोम दे॒व ते नृ॑भिः  
सु॒तस्ये॒ष्टय॑जुषः स्तु॒तस्तो॑मस्य श॒स्तोक्थ॑स्य यो भ॒क्षो अ॑श्च॒सनिर्यो॑  
गो॒सनि॑स्तस्य ते पि॒तृभिर् भ॒क्षं कृ॑त॒स्योप॑हूत॒स्यो-प॑हूतो  
भक्ष॑यामि ॥ 37 (वि॒श्वच॑रु॒षणे॑ - त्रि॒ष्टुच्छ॑न्दस॒ इन्द्र॑पीतस्य  
नरा॑श॒ꣳसपी॑तस्या - ति - स्तु॒तस्तो॑मस्य - जी॒वाय॑ नमो॒ वः  
पि॒तरो- ब॑भूव - चतु॑श्चारि॒ꣳसच्च॑)

## 10 ध्रुवाऽसि धरुणाऽस्तृता

### T.S. 4.2.9.1.

ध्रु॒वाऽसि॑ ध॒रुणाऽस्तृ॑ता वि॒श्वक॑र्मणा सु॒कृ॒ता ।  
मा त्वा॑ समु॒द्र उद्व॑धीन् मा सु॒पर्णो॑ ऽव्यथ॑माना पृथि॒वीं दृ॒ह ।  
प्र॒जाप॑तिस्त्वा सादयतु पृथि॒व्याः पृ॒ष्ठे व्यच॑स्वतीं प्रथ॑स्वतीं प्रथो॑ऽसि  
पृथि॒व्यसि॑ भू॒रसि॑ भू॒मि-र॒स्य-दि॒ति-र॒सि वि॒श्वधा॑या वि॒श्वस्य॑  
भुव॑नस्य ध॒र्त्री पृथि॒वीं य॑च्छ पृथि॒वीं दृ॒ह पृथि॒वीं मा हि॑सीर्  
वि॒श्वस्मै॑ प्रा॒णाया-पा॒नाय॑ व्या॒नायो-दा॒नाय॑ प्रति॒ष्ठायै॑, [ ] 38

### T.S. 4.2.9.2.

च॒रि॒त्राया॑ग्निस्त्वाऽभि पातु म॒ह्या स्व॒स्त्या छ॒र्दिषा॑ श॒न्तमे॑न तया॑  
दे॒वत॑याऽङ्गि॒रस्वद् ध्रु॒वा सी॑द । काण्डा॑त् काण्डा॑त् प्र॒रोह॑न्ती प॒रुषः॑  
प॒रुषः॑ परि॑ । ए॒वा नो॑ दूर्वे॒ प्र त॑नु स॒हस्रे॑ण श॒तेन॑ च ।  
या श॒तेन॑ प्र॒तनो॑षि स॒हस्रे॑ण वि॒रोह॑सि ।  
तस्या॑स्ते दे॒वीष्ट॑के वि॒धेम॑ ह॒विषा॑ व॒यं ।

अ॒षाढा॑सि॒ सह॒मा॒ना सह॒स्व॒रातीः॑ सह॒स्व॒राती॒यतः॑ सह॒स्व॒ पृ॒त॒नाः  
सह॒स्व॒ पृ॒त॒न्यतः॑ । सह॒स्र॒वीर्या॑, [ ] 39

**T.S. 4.2.9.3.**

ऽसि॒ सा मा॑ जि॒न्व ॥ मधु॑ वा॒ता ऋ॒ताय॑ते मधु॑ क्षर॒न्ति सि॒न्धवः॑ ।  
मा॒ध्वी॑ नः॑ स॒न्त्वोष॑धीः । मधु॑ न॒क्तमु॑तोष॒सि मधु॑म॒त् पा॒र्थि॒वꣳ रजः॑ ।  
मधु॑ द्यौर॑स्तु नः॑ पि॒ता । मधु॑मा॒न्नो व॒नस्प॑तिर् मधु॑माꣳ अस्तु॑ सू॒र्यः ।  
मा॒ध्वीर्गा॒वो भ॑वन्तु नः॑ । म॒ही द्यौः॑ पृ॒थि॒वी च॑ न इ॒मं य॒ज्ञं मि॑मिक्षतां ।  
पि॒पृ॒तां नो॑ भ॒रीम॑भिः । तद् वि॒ष्णोः॑ प॒र॒मं, [ ] 40

**T.S. 4.2.9.4.**

प॒दꣳ स॒दा प॑श्यन्ति सू॒र्यः॑ । दि॒वीव॑ चक्षु॒-रा॑त॒तं ।  
ध्रु॒वाऽसि॑ पृ॒थि॒वि सह॒स्व॒ पृ॒त॒न्यतः॑ । स्यू॒ता दे॒वोभि॑-र॒मृते॑नाऽऽगाः॑ ।  
यास्ते॑ अ॒ग्ने सू॒र्ये रु॑च उ॒द्यतो॑ दि॒व-मा॑त॒न्वन्ति॑ र॒श्मि॑भिः ।  
ताभिः॑ स॒र्वाभी॑ रु॒चे ज॑नाय नस्कृ॒धि ।  
या वो॑ दे॒वाः सू॒र्ये रु॑चो गो॒ष्वश्वे॑षु या रु॒चः ।

इन्द्रा॑ग्नी॒ ताभिः॑ सर्वा॑भी रुचं॑ नो धत्त बृहस्पते॑ ।

विराट्, [ ] 41

**T.S. 4.2.9.5.**

ज्योति॑-रधारय॑त् स॒म्राड् ज्योति॑-रधारय॑त् स्व॒राड् ज्योति॑-रधारय॑त् ।

अग्ने॑ यु॒क्ष्वा हि ये॑ तवा॑श्वासो दे॒व सा॒धवः॑ । अ॒रं व॑हन्त्या॒श्वः ।

यु॒क्ष्वा हि दे॑व॒हूत॑मा॒ञ् अश्वा॑ अग्ने॑ र॒थीरि॑व । नि होता॑ पू॒र्व्यः स॑दः ।

द्र॒फ्सश्च॑स्क॒न्द पृ॒थि॒वीम॑नु॒ द्यामि॑मं च॒ योनि॑मनु॒ यश्च॑ पू॒र्वः ।

तृती॑यं यो॒निम॑नु॒ संच॑रन्तं द्र॒फ्सं जुहो॑म्यनु॒ सप्त, [ ] 42

**T.S. 4.2.9.6.**

हो॒त्राः । अ॒भूदि॑दं वि॒श्वस्य॑ भु॒वन॑स्य॒ वाजि॑नम॒ग्ने वै॒श्वान॑रस्य॒ च ।

अ॒ग्नि ज्यो॑तिषा॒ ज्योति॑ष्मान् रु॒क्मो वर्च॑सा॒ वर्च॑स्वान् ।

ऋ॒चे त्वा॑ रु॒चे त्वा॑ स॒मि॒त् स्र॑वन्ति स॒रितो॑ न धे॒नाः ।

अ॒न्तर् ह॒दा म॑नसा पू॒यमा॑नाः । घृ॒तस्य॑ धा॒रा अ॒भि चा॑कशीमि ।

हि॒रण्य॑यो वे॒तसो॑ म॒द्ध्य आ॑सां ।

तस्मिन् सु॒पर्णो॑ म॒धुकृ॑त् कु॒लायी॑ भ॒जन्नास्ते॑ म॒धु दे॒वता॑भ्यः ।  
तस्याऽऽस॑ते ह॒रयः॑ स॒प्त ती॑रे ( ) स्व॒धां दु॑हाना अ॒मृत॑स्य धा॒रां ॥ 43  
(प्र॒तिष्ठा॑यै-स॒हस्र॑वीर्या-प॒रमं-वि॒राट्-थ्स॒प्त-ती॑रे च॒त्वारि॑ च)

### 11 अ॒ग्न उ॒दधे॑ या त इ॒षुः

#### T.S. 5-5-9-1

अ॒ग्न उ॒दधे॑ या त इ॒षु र्यु॑वा ना॒म तया॑ नो मृ॒ड तस्या॑स्ते  
नम॑स्तस्यास्त उप जी॒वन्तो॑ भूया॒स्माग्ने॑ दु॒ध्र ग॒ह्य कि॒ञ्शिल॑ वन्य या  
त इ॒षु र्यु॑वा ना॒म तया॑ नो मृ॒ड तस्या॑स्ते नम॑स्तस्यास्त उप जी॒वन्तो॑  
भूया॑स्म पञ्च॒ वा ए॒ते ऽग्नयो॑ यच्चि॒तय॑ उ॒दधि॑रेव  
ना॒म प्र॒थमो॑ दु॒ध्रो, [ ] 44

#### T.S. 5-5-9-2

द्वि॒तीयो॑ ग॒ह्यस्तृ॒तीयः॑ कि॒ञ्शिल॑श्चतु॒र्थो वन्यः॑ पञ्च॒मस्ते॒भ्यो यदा॑हु॒तीर्  
न जु॑हु॒या-द॒ध्वर्यु॑ च यज॑मानं च प्र द॑हे॒युर् यदे॒ता आ॑हु॒तीर् जु॑होति  
भा॒गधे॑ये॒नैवैना॑-ञ्छम॑यति नाऽऽर्ति॑-मा॒र्छत्य॑-ध्व॒र्यु न यज॑मानो वाङ्

म आ॒सन् न॒सोः प्रा॒णो ऽक्ष्योश्चक्षुः॑ कर्ण॑योः श्रोत्रं॑ बाहु॒वोर्  
बल॑-मू॒रुवोरोजो॑ ऽरि॒ष्टा विश्वा॑न्यङ्गानि॑ त॒नूः, [ ] 45

**T.S. 5-5-9-3**

त॒नुवा मे॑ सह॒ नम॑स्ते अस्तु॒ मा मा हि॑स्सीरप॒ वा ए॒तस्मात् प्रा॒णाः  
क्राम॑न्ति यो॑ ऽग्निं चि॒न्वन्नधि॑ क्राम॑ति वाङ् म आ॒सन् न॒सोः प्रा॒ण  
इत्या॑ह प्रा॒णाने॒वाऽऽत्मन्॑ धत्ते॒ यो रु॒द्रो अ॒ग्नौ यो अ॒प्सु य  
ओष॑धीषु॒ यो रु॒द्रो विश्वा॑ भुव॑नाऽऽवि॒वेश॑ तस्मै॑ रु॒द्राय॑ नमो॑  
अ॒स्त्वाहु॑तिभागा॒ वा अ॒न्ये रु॒द्रा ह॒विर्भा॑गा, [ ] 46

**T.S. 5-5-9-4**

अ॒न्ये श॑तरु॒द्रीय॑ हु॒त्वा गा॑वीधु॒कं च॒रुमे॒तेन॑ यजु॒षा च॒रमा॑या-  
मिष्ट॑कायां॒ नि द॑ध्याद् भा॒गधे॑ये-नै॒वैन॑श्च॒ शम॑यति॒ तस्य॑ त्वै  
श॑तरु॒द्रीय॑ हु॒त-मि॑त्याहु॒र् यस्यै॒तद॒ग्नौ क्रि॒यत॑ इति॒ वस॑वस्त्वा  
रु॒द्रैः पु॒रस्ता॑त् पा॒न्तु पि॒तर॑स्त्वा य॒मरा॑जानः॒ पितृ॑भिर् दक्षि॒णतः॑

॥ पान्त्वादि॒त्यास्त्वा॒ वि॒श्वैर्दे॒वैः प॒श्चात् पा॒न्तु द्यु॒ता॒न॒स्त्वा मा॒रु॒तो

म॒रु॒द्भि॑-रु॒त्तर॑तः पा॒तु, ( ) [ ] 47

**T.S. 5-5-9-5**

दे॒वा-स्त्वे॒न्द्रज्ये॑ष्ठा व॒रु॒णरा॑जानो ऽध॒स्ता॒च्चो-प॑रि॒ष्टाच्च॑ पा॒न्तु न॒ वा  
ए॒तेन॑ पू॒तो न मे॑द्ध्यो न प्रो॒क्षितो॑ यदे॒नमे॑तः प्रा॒चीनं॑ प्रो॒क्षति॑ यथ्  
सं॒चित॑-मा॒ज्येन॑ प्रो॒क्षति॑ तेन॑ पू॒तस्तेन॑ मे॑द्ध्यस्तेन॑ प्रो॒क्षितः॑ ॥ 48

( दुध्र - स्तनूर. - ह॒विर्भा॑गाः - पा॒तु - द्वा॒त्रिं॑शच्च)

**12 शिरो वा एतद् यज्ञस्य**

**T.S.6-2-11-1**

शि॒रो वा ए॒तद् य॒ज्ञस्य॑ य॒द्धवि॑र्धानं प्रा॒णा उ॒पर॑वा ह॒विर्धा॑नि॒ खाय॑न्ते  
तस्मा॑-च्छी॒र्षन् प्रा॒णा अ॒धस्ता॑त् खाय॑न्ते तस्मा॑-द॒धस्ता॑-च्छी॒र्षाः  
प्रा॒णा र॑क्षो॒हणो॑ व॒लग॑हनो॒ वैष्ण॑वान् ख॒नामी॑त्याह वैष्ण॒वा हि  
दे॒वत॑यो॒पर॑वा अ॒सुरा॒ वै नि॒र्यन्तो॑ दे॒वानां॑ प्रा॒णेषु॑ व॒लगान् न्य॑ख॒नन्



तान् बाहुमात्रे ऽन्वविन्दन् तस्माद् बाहुमात्राः खायन्त

इदमहं तं वलगमुद् वपामि, [ ] 49

**T.S.6-2-11-2**

यं नः समानो यमसमानो निचखानेत्याह द्वौ वाव पुरुषौ यश्चैव  
समानो यश्चासमानो यमेवास्मै तौ वलगं निखनतस्त-मेवोद् वपति  
संतृणति तस्मात् संतृण्णा अन्तरतः प्राणा न सं भिनति तस्मा-  
दसंभिन्नाः प्राणा अपो ऽव नयति तस्मा-दार्द्रा अन्तरतः प्राणा  
यवमतीरव नयत्, [ ] 50

**T.S.6-2-11-3**

यूर्ग्वै यवः प्राणा उपरवाः प्राणेष्वेवोर्जं दधाति बर्.हिरव स्तृणाति  
तस्माल्-लोमशा अन्तरतः प्राणा आज्येन व्याधारयति तेजो वा  
आज्यं प्राणा उपरवाः प्राणेष्वेव तेजो दधाति हनू वा एते यज्ञस्य  
यद-धिषवणे न संतृणत्यसंतृणो हि हनू अथो खलु दीर्घसोमे  
संतृद्ये धृत्यै शिरो वा एतद् यज्ञस्य यद्धविर्धानं, [ ] 51

**T.S.6-2-11-4**

प्रा॒णा उप॒र॒वा ह॒नू अधि॒ष॒व॒णे जि॒ह्वा च॒र्म ग्रा॒वा॒णो द॒न्ता मु॒ख-  
मा॒ह॒व॒नी॒यो ना॒सि॒को-त्त॒र॒वे॒दि-रु॒द॒रꣳ स॒दो य॒दा ख॒लु वै जि॒ह्वा  
द॒थ्स्व॒धि खा॒द॒त्य॒थ मु॒खं ग॒च्छ॒ति य॒दा मु॒खं ग॒च्छ-त्य॒थो॒द॒रं ग॒च्छ॒ति  
तस्मा॑द्ध॒वि॒र्ध॒ने च॒र्म॒न्ना॒धि ग्रा॒व॒भि॒र॒भि॒षु॒त्या ऽऽह॒व॒नी॒ये हु॒त्वा प्र॒त्य॒ञ्चः  
प॒रे॒त्य स॒द॒सि भ॒क्ष॒य॒न्ति यो वै वि॒रा॒जो य॒ज्ञ॒मु॒खे दो॒हं वैद  
दु॒ह ए॒वै ( ) ना॒मि॒यं वै वि॒रा॒ड् तस्यै॒ त्वक् च॒र्मो॒धो ऽधि॒ष॒व॒णे स्त॒ना  
उप॒र॒वा ग्रा॒वा॒णो व॒थ्सा ऋ॒त्वि॒जो दु॒ह॒न्ति सो॒मः प॒यो य ए॒वं वैद  
दु॒ह ए॒वैनां॑ ॥ 52

(व॒पा॒मि - य॒व॒म॒ती॒र॒व॒ न॒य॒ति - ह॒वि॒र्ध॒न - मे॒व त्र॒यो॒विं॒श॒तिश्च)

**13 असावादित्यो ऽस्मिन् ल्लोक**

**T.S.7-3-10-1**

अ॒सा॒वा॒दि॒त्यो ऽस्मिन् ल्लो॒क आ॒सी॒त् तं दे॒वाः पृ॒ष्ठैः प॒रि॒गृ॒ह्य सु॒व॒र्गं  
ल्लो॒क-म॒ग॒म॒य॒न् प॒रै॒र॒व॒स्ता॒त् प॒र्य॒गृ॒ह्णन् दि॒वा॒की॒र्त्ये॒न सु॒व॒र्गे लो॒के  
प्र॒त्य॒स्था॒प॒य॒न् प॒रैः प॒र॒स्ता॒त् प॒र्य॒गृ॒ह्णन् पृ॒ष्ठै-रु॒पा॒वा॒रो॒ह॒न्थ॒ स वा

अ॒सा॒वादि॒त्यो ऽमु॒ष्मिन् लो॒के परै॑-रु॒भय॑तः परि॒गृही॑तो  
यत् पृ॒ष्ठानि॑ भव॒न्ति सु॒वर्ग॑मे॒व तै॒लोकं॑ यज॒माना॑ यन्ति॒ परै॑-र॒वस्ता॑त्  
परि॑ गृह्णन्ति दि॒वाकी॑र्त्ये॒न, [ ] 53

**T.S.7-3-10-2**

सु॒वर्गे लो॒के प्र॑ति ति॒ष्ठन्ति॑ परैः॑ प॒रस्ता॑त् परि॑ गृह्णन्ति पृ॒ष्ठै-  
रु॒पाव॑रोहन्ति॒ यत् परै॑ प॒रस्ता॑न् न स्युः प॒राञ्चः॑ सु॒वर्गाल्लो॒कान्  
नि॒ष्पद्ये॑रन्॒ यद॒वस्ता॑न् न स्युः प्र॒जा निर्द॑हेयुर॒भितो॑ दि॒वाकी॑र्त्यं  
परः॑सा॒मानो॑ भव॒न्ति सु॒वर्ग ए॒वैनान्॑ लो॒क उ॒भय॑तः परि॑ गृह्णन्ति  
यज॒माना॑ वै दि॒वाकी॑र्त्यं सँव॒त्सरः॑ परः॑सा॒मानो ऽभि॑तो दि॒वाकी॑र्त्यं  
परः॑सा॒मानो॑ भव॒न्ति सँव॒त्सर ए॒वोभ॑यतः, [ ] 54

**T.S.7-3-10-3**

प्र॑ति ति॒ष्ठन्ति॑ पृ॒ष्ठं वै दि॒वाकी॑र्त्यं पा॒र्श्वे परः॑सा॒मानो ऽभि॑तो दि॒वाकी॑र्त्यं  
परः॑सा॒मानो॑ भव॒न्ति तस्मा॑द॒भितः॑ पृ॒ष्ठं पा॒र्श्वे भू॒यिष्ठा॑ ग्र॒हा गृह्ण॑न्ते  
भू॒यिष्ठं॑ शस्यते य॒ज्ञस्यै॒व तन् म॑द्ध्यतो॒ ग्रन्थिं॑ ग्र॒थन्त्य॑वि॒स्रसा॑य

स॒प्त गृ॒ह्यन्ते॑ स॒प्त वै शी॒र्ष॒ण्याः प्रा॒णाः प्रा॒णाने॒व यज॑मानेषु दधति  
यत् परा॒चीना॑नि पृ॒ष्ठानि॑ भव॒न्त्यमु॒मे॒व तैर्लो॒क-म॒भ्यारो॑हन्ति

यदि॒मं लो॒कं न, [ ] 55

**T.S.7-3-10-4**

प्र॒त्यव॑रोहे॒युरु॑द् वा मा॒द्येयु॑र् यज॑मानाः प्र वा मी॒येर॑न् यत्  
प्र॒तीची॑नानि पृ॒ष्ठानि॑ भव॒न्तीम॒मे॒व तैर्लो॒कं प्र॒त्यव॑रोह॒न्त्यथो॑ अ॒स्मिन्ने॒व  
लो॒के प्र॒ति ति॑ष्ठन्त्यनु॒न्मादा॑येन्द्रो वा अ॒प्रति॑ष्ठित आसी॒थ् स प्र॒जाप॑ति  
-मु॒पाधा॑वत् तस्मा॑ ए॒त-मे॒कवि॑ञ्शतिरा॒त्रं प्रा॑यच्छत् तमा॒हर॑त्  
तेना॑यजत॒ ततो॑ वै स प्र॒त्यति॑ष्ठ॒द्ये बहु॑याजिनो ऽप्रति॑ष्ठिता, [ ] 56

**T.S.7-3-10-5**

स्यु॒स्त एक॑विञ्शतिरा॒त्र-मा॑सीरन् द्वा॒दश॒ मासाः पञ्च॑-र्त॒वस्त्र॑य इ॒मे  
लो॒का अ॒सावा॑दित्य॒ एक॑विञ्श॒ एता॑वन्तो वै दे॒वलो॒कास्तेष्वे॒व  
यथा॑पूर्वं प्र॒ति ति॑ष्ठन्त्यसा॒वादित्यो॑ न व्य॒रोच॑त स प्र॒जाप॑ति-मु॒पाधा॑वत्  
तस्मा॑ ए॒त-मे॒कवि॑ञ्शतिरा॒त्रं प्रा॑यच्छत् तमा॒हर॑त् तेना॑यजत॒ ततो॑

वै सोऽरोचत॒ य ए॒वं वि॒द्वान्स॑ एक॒वि॒ंशति॑रात्र-मास॒ते ( ) रोच॑न्त  
ए॒वैक॒वि॒ंशति॑रात्रो भवति॒ रुग्वा॑ एक॒वि॒ंशो रुच॑मे॒व गच्छ॑न्त्यथो  
प्रति॒ष्ठामे॒व प्रति॒ष्ठा ह्येक॒वि॒ंशो ऽति॑रात्रा-व॒भितो॑ भवतो ब्रह्मवर्च॒सस्य॑  
परिगृहीत्यै ॥ 57 (गृह्णन्ति॒ दिवा॒कीर्त्यै॑- नैवोभयतो॒ - ना -  
प्रति॒ष्ठिता॒ - आस॑त एक॒वि॒ंशति॑श्च )

#### 14 सन्ततिर्वा एते ग्रहाः

##### T.B.1-2-3-1

सन्तति॒र्वा ए॒ते ग्र॒हाः । यत्परः॑ सामानः॑ । वि॒षू॒वान् दिवा॒कीर्त्यै॑ ।  
यथा॒ शाला॑यै पक्ष॒सी । ए॒व॒ं सँव॑त्सरस्य पक्ष॒सी । यदे॒तेन॑ गृह्ये॒रन् ।  
वि॒षू॒ची सँव॑त्सरस्य पक्ष॒सी व्य॑वस्र॒ंसेया॑तां । आ॒र्ति॒माच्छे॑युः ।  
यदे॒ते गृह्य॑न्ते । यथा॒ शाला॑यै पक्ष॒सी मद्ध्य॑मं वँ॒शम॑भि  
समायच्छति ॥ 58

##### T.B.1-2-3-2

ए॒व॒ं सँव॑त्सरस्य पक्ष॒सी दिवा॒कीर्त्यै॑म॒भि सन्त॑न्वन्ति ।  
नाऽऽर्ति॒माच्छे॑न्ति । एक॒वि॒ंश-म॑हर्भवति । शुक्रा॒ग्रा ग्र॒हा गृह्य॑न्ते ।

प्र॒त्यु॒त्त॒ब्ध्यै॑ स॒य॒त्वा॒य । सौ॒र्य॑ ए॒त॒द॒हः॑ प॒शु॒राल॑भ्यते ।

सौ॒र्यो॑ऽति॒ग्रा॒ह्यो॑ गृ॒ह्यते॑ । अ॒ह॒रे॒व रू॒पे॒ण स॒म॒र्द्ध॑यन्ति ।

अथो॑ अ॒ह ए॒वैष॑ ब॒लि॒र्हि॒यते॑ । स॒प्तै॒त-द॑हरति॒ग्रा॒ह्या॑ गृ॒ह्यन्ते॑ ॥ 59

**T.B.1-2-3-3**

स॒प्त॒ वै शी॒र्ष॒ण्याः॑ प्रा॒णाः । अ॒सा॒वा॒दि॒त्यः॑ शि॒रः॑ प्र॒जानां॑ ।

शी॒र्ष॒न्ने॒व प्र॒जानां॑ प्रा॒णान् द॑धाति । तस्मा॑त् स॒प्त॒शी॒र्ष॒न्-प्रा॒णाः ।

इ॒न्द्रो॑ वृ॒त्रं ह॒त्वा । अ॒सु॒रान्-प॒रा॒भाव्य॑ ।

स इ॒मान् लो॒कान् भ्य॑जयत् । तस्या॒सौ लो॒कोऽन॑भिजित आसीत् ।

तं वि॒श्व॒कर्मा॑ भू॒त्वाऽभ्य॑जयत् । यद्वै॑श्व॒कर्म॑णो गृ॒ह्यते॑ ॥ 60

**T.B.1-2-3-4**

सु॒व॒र्ग॒स्य लो॒कस्या॑भिजित्यै । प्र वा ए॒तेऽस्मा॑ल्लो॒काच्च॑वन्ते ।

ये वै॑श्व॒कर्म॑णं गृ॒ह्यते॑ । आ॒दि॒त्यः श्वो॑ गृ॒ह्यते॑ ।

इ॒यं वा॑ अ॒दि॒तिः । अ॒स्यामे॒व प्र॒ति॒तिष्ठ॑न्ति ।

अ॒न्यो॒न्यो गृ॒ह्येते॑ । वि॒श्वान्ये॑वा॒न्येन॑ क॒र्माणि॑ कु॒र्वाणा॑ यन्ति ।

अस्यामन्येन प्रति तिष्ठन्ति ।

तावाऽपरार्थात् सँवत्सरस्यान्योन्यो गृह्येते ( ) ।

तावुभौ सह महाव्रते गृह्येते । यज्ञस्यैवान्तं गत्वा ।

उभयो लोकोऽः प्रतितिष्ठन्ति । अर्क्यमुक्थं भवति ।

अन्नाद्यस्या वरुध्यै ॥ 61 ( समायच्छ – त्यतिग्राह्या गृह्यन्ते –

गृह्यन्ते – सँवत्सरस्यान्योन्यो गृह्येते पञ्च च )

### 15 एकविंश एष भवति

#### T.B.1-2-4-1

एकविंश एष भवति । एतेन वै देवा एकविंशेन ।

आदित्यमित उत्तमं सुवर्गं लोक-मारोहयन् ।

स वा एष इत एकविंशः । तस्य दशावस्तादहानि ।

दश परस्तात् । स वा एष विराज्युभयतः प्रतिष्ठितः ।

विराजि हि वा एष उभयतः प्रतिष्ठितः । तस्मादन्तरेमौ लोकौ यन् ।

सर्वेषु सुवर्गेषु लोकेष्व-भितपन्नेति ॥ 62

**T.B. 1-2-4-2**

दे॒वा वा आ॒दि॒त्यस्य॑ सु॒वर्गस्य॑ लो॒कस्य॑ । परा॑चोऽतिपा॒दाद॑बिभयुः ।  
तं छन्दो॑भिरदृ॒ञ्-ह॒न्धृत्यै॑ ॥ दे॒वा वा आ॒दि॒त्यस्य॑ सु॒वर्गस्य॑ लो॒कस्य॑ ।  
अवा॑चो ऽवपा॒दाद॑बिभयुः । तं प॒ञ्चभी॑ र॒श्मिभि॑रुदवयन् ।  
तस्मा॑-दे॒कवि॒ञ्शोऽह॑न्पञ्च दि॒वाकी॒र्त्यानि॑ क्रियन्ते ।  
र॒श्मयो वै दि॒वाकी॒र्त्यानि॑ । ये गा॒यत्रे॑ ।  
ते गा॒यत्री॑षू॒त्तर॑योः पव॒मान॑योः ॥ 63

**T.B. 1-2-4-3**

महा॑दि॒वाकी॒र्त्यञ् हो॒तुः पृ॒ष्ठं । वि॒कर्णं॑ ब्र॒ह्मसा॒मं । भा॒सोऽग्नि॑ष्टोमः ।  
अथै॑तानि॒ परा॑णि । परै॒ वै दे॒वा आ॒दि॒त्यञ् सु॒वर्गं॑ लो॒कम॑पा॒रय॑न् ।  
यद॑पा॒रय॑न् । तत्प॑राणां प॒रत्वं । पा॒रय॑न्त्ये॒नं परा॑णि ।  
य ए॒वं वैद॑ । अथै॑तानि॒ स्पर्षा॑णि ( ) ।  
स्पर्षै॒ वै दे॒वा आ॒दि॒त्यञ् सु॒वर्गं॑ लो॒कम॑स्पा॒रय॑न् ।



यदस्पा॒रयन् । तथ्स्पा॒राणां॑ स्पा॒रत्वं ।

स्पा॒रयन्त्ये॒न॑ स्पा॒राणि । य ए॒वं वे॒द ॥ 64

( ए॒ति – प॒व॒मा॒नयोः॑ – स्पा॒राणि॑ पञ्च॒ च )

### 16 इन्द्रो वृत्रं हत्वा

#### T.B.1-3-10-1

इन्द्रो॑ वृ॒त्रं ह॒त्वा । अ॒सुरान् प॒राभा॒व्य । सोऽमा॒वास्यां॑ प्र॒त्याग॑च्छत् ।

ते पि॒तरः॑ पू॒र्वेद्यु॑-रा॒गच्छन् । पि॒तृन् य॒ज्ञोऽग॑च्छत् । तं दे॒वाः

पुन॑रयाचन्त । तमे॒भ्यो न पुन॑रददुः । तेऽब्रु॒वन् वरं॑ वृ॒णाम॑है ।

अथ॑ वः पुन॑र्दास्यामः । अ॒स्मभ्य॑मे॒व पू॒र्वेद्युः॑ क्रि॒याता॑ इति ॥ 65

#### T.B.1-3-10-2

तमे॒भ्यः पुन॑रददुः । तस्मा॑त् पि॒तृभ्यः॑ पू॒र्वेद्युः॑ क्रि॒यते ।

यत् पि॒तृभ्यः॑ पू॒र्वेद्युः॑ करो॑ति । पि॒तृभ्य॑ ए॒व तद् य॒ज्ञं नि॒ष्क्री॒य य॒ज॒मा॒नः

प्र॒तनु॑ते । सो॒माय॑ पि॒तृपी॑ताय स्व॒धा नम॑ इत्याह ।

पि॒तुरे॒वाधि॑ सोम॒पीथ॑मवरुन्धे ।

न हि पि॒ता प्र॒मीय॑माण॒ आहै॑ष सोम॒पीथ॑ इति ।

इन्द्रि॒यं॑ वै सोम॑पी॒थः ।

इन्द्रि॒यमे॒व सोम॑पी॒थमव॑रुन्धे ।

तेनेन्द्रि॒येण॑ द्वि॒तीयां॑ जा॒या-म॒भ्यश्नु॑ते ॥ 66

**T.B.1-3-10-3**

ए॒तद्वै ब्रा॒ह्मणं॑ पु॒रा वा॑ज॒श्रव॑सा वि॒दाम॑क्रन् ।

तस्मा॑त्ते द्वे॒ द्वे जा॒ये अ॒भ्याक्ष॑त । य ए॒वं वै॑द ।

अ॒भि द्वि॒तीयां॑ जा॒याम॑श्नुते । अ॒ग्नये॑ क॒व्यवा॑ह॒नाय॑ स्व॒धा नम॑ इत्या॒ह ।

य ए॒व पि॒तॄणा॑म॒ग्निः । तं प्री॑णाति । ति॒स्र आ॑हु॒तीर् जु॑होति ।

त्रि॒र्नि॒दधा॑ति । षट्॑त् संप॒द्यन्ते॑ ॥ 67

**T.B.1-3-10-4**

षड्॑वा ऋ॒तवः॑ । ऋ॒तूने॒व प्री॑णाति । तू॒ष्णीं मे॑क्ष॒णमा॑दधाति ।

अस्ति॑ वा हि ष॒ष्ठ ऋ॒तुर्न वा॑ । दे॒वान् वै पि॒तृन् प्री॑तान् ।

म॒नुष्याः॑ पि॒तरो॑ऽनु प्र॒पिप॑ते । ति॒स्र आ॑हु॒तीर्जु॑होति । त्रि॒र्नि॒दधा॑ति ।

षट्॑त् संप॒द्यन्ते॑ । षड्॑वा ऋ॒तवः॑ ॥ 68

**T.B. 1-3-10-5**

ऋ॒तवः॑ ख॒लु वै दे॒वाः पि॒तरः॑ । ऋ॒तूने॒व दे॒वान् पि॒तृन् प्री॑णाति ।  
तान् प्री॒तान् । म॒नु॒ष्याः पि॒तरोऽनु॑ प्र॒पिप॑ते ।  
सकृ॑दाच्छि॒न्नं ब॒र्हिर्भ॑वति । सकृ॑दिव हि पि॒तरः॑ । त्रि॒र्नि॒द॒धाति॑ ।  
तृ॒तीये॒ वा इ॒तो लो॒के पि॒तरः॑ । ताने॒व प्री॑णाति । प॒रा॒डाव॑र्त्तते ॥ 69

**T.B.1-3-10-6**

ह्री॒का हि पि॒तरः॑ । ओ॒ष्म॒णो व्या॒वृ॒त उपा॑स्ते ।  
ऊ॒ष्मभा॑गा हि पि॒तरः॑ । ब्र॒ह्म॒वादि॑नो वदन्ति ।  
प्रा॒श्यां(३) न प्रा॒श्या(३)मि॑ति । यत् प्रा॒श्नी॒यात् ।  
ज॒न्यम॑न्नम॒द्यात् । प्र॒मायु॑कः स्यात् ।  
यन्न प्रा॒श्नी॒यात् । अ॒ह॒विः स्यात् ॥ 70

**T.B.1-3-10-7**

पि॒तृभ्य॑ आ॒वृ॒श्च्ये॒त । अ॒व॒घ्ने॒यमे॒व ।  
तन्ने॒व प्रा॑शितं ने॒वाप्रा॑शितं । वी॒रं वा॑ वै पि॒तरः॑ प्र॒यन्तो॑ हर॒न्ति ।  
वी॒रं वा॑ द॒दति॑ । द॒शां छि॑नन्ति ।

हरणभागा॑ हि पि॒तरः॑ । पि॒तृ॒ने॒व नि॒रव॑दयते ।

उत्त॑र आयु॒षि लो॑म छिन्दीत । पि॒तृ॒णा॒ञ्छे॑तर् हि ने॒दीयः॑ ॥ 71

**T.B.1-3-10-8**

नम॑स्करोति । नम॑स्का॒रो हि पि॒तृ॒णां॑ । नमो॑ वः पि॒तरो॑ रसा॒य ।

नमो॑ वः पि॒तरः॑ शु॒ष्मा॒य । नमो॑ वः पि॒तरो॑ जी॒वा॒य ।

नमो॑ वः पि॒तरः॑ स्व॒धा॒यै॑ ॥ नमो॑ वः पि॒तरो॑ म॒न्य॒वै॑ ॥

नमो॑ वः पि॒तरो॑ घो॒रा॒य । पि॒तरो॑ नमो॑ वः ।

य ए॒तस्मिन्॑ लो॒के स्थ ॥ 72

**T.B.1-3-10-9**

यु॒ष्मा॒ञ्छे॑ स्ते ऽनु । ये॒ऽस्मिन्॑ लो॒के । मां ते॑ ऽनु ।

यए॒तस्मिन्॑ लो॒के स्थ । यू॒यं तेषां॑ व॒सि॒ष्ठा भू॒यास्त॑ ।

ये॒ऽस्मिन्॑ लो॒के । अ॒हं तेषां॑ व॒सि॒ष्ठो भू॒यास॒मित्या॑ह ।

व॒सि॒ष्ठः स॒मा॒ना॒नां॑ भवति । य ए॒वं वि॒द्वान् पि॒तृ॒भ्यः॑ क॒रोति॑ ।

ए॒ष वै म॒नु॒ष्या॒णां॑ य॒ज्ञः ॥ 73

**T.B.1-3-10-10**

दे॒वानां॑ वा॒ इ॒तरे॑ य॒ज्ञाः । ते॒न वा॒ ए॒तत् पि॒तृलो॒के च॑रति ।  
यत् पि॒तृभ्यः॑ क॒रोति॑ । स ई॒श्वरः॑ प्र॒मेतोः॑ । प्रा॒जाप॒त्यय॒र्चा पु॒नरै॑ति ।  
य॒ज्ञो वै प्र॒जाप॑तिः । य॒ज्ञेनै॒व स॒ह पु॒नरै॑ति । न प्र॒मायु॑को भवति ।  
पि॒तृलो॒के वा ए॒तद् यज॑मानश्चरति । यत् पि॒तृभ्यः॑ क॒रोति॑ ( ) ।  
स ई॒श्वर आ॒र्त्तिमा॒र्त्तोः॑ । प्र॒जाप॑तिस्त्वा वै॒नं त॒त उ॒न्नेतु॑-म॒र्हती॒त्याहुः॑ ।  
यत् प्रा॒जाप॒त्यय॒र्चा पु॒नरै॑ति । प्र॒जाप॑ति-रे॒वैनं॑ त॒त उ॒न्नय॑ति ।  
ना॒र्त्तिमा॒र्च्छति॑ यज॑मानः ॥ 74

( इ - त्य॑श्नुते - प॒द्यन्ते - प॒द्यन्ते ष॒ड्वा ऋ॒तवो॑ - वर्त्त॑ते -  
ऽह॑विः स्या - न्ने॒दीयः॑ - स्थ - य॒ज्ञो - यज॑मानश्चरति यत् पि॒तृभ्यः॑  
क॒रोति॑ पञ्च च )

**17 वैश्वदेवेन वै प्रजापतिः**

**T.B.1-6-8-1**

वै॒श्वदे॒वेन॒ वै प्र॒जाप॑तिः प्र॒जा अ॑सृजत ।  
ता व॑रुण प्र॒घासै॑ व॒रुण॑पा॒शादमु॑ञ्चत् । सा॒कमे॒धैः प्र॒त्यस्था॑पयत् ।

त्र्य॑ंब॒कै रु॒द्रं नि॒रवा॑दयत । पि॒तृ॒य॒ज्ञेन॑ सु॒वर्गं लो॒कम॑गमयत् ।  
यद् वै॑श्च॒दे॒वेन॑ यज॑ते । प्र॒जा ए॒व तद् यज॑मानः सृ॒जते ।  
ता व॑रुण प्र॒घा॒सै र्व॑रुणपा॒शान् मु॑ञ्चति । सा॒क॒मे॒धैः प्र॑तिष्ठापयति ।  
त्र्य॑ंब॒कै रु॒द्रं नि॒रव॑दयते ॥ 75

**T.B.1-6-8-2**

पि॒तृ॒य॒ज्ञेन॑ सु॒वर्गं लो॒कं ग॑मयति । द॒क्षि॒णतः॑ प्रा॒ची॒नावी॑ती निर्व॑पति ।  
द॒क्षि॒णावृ॑द्धि पि॒तृणां॑ । अना॑दृत्य तत् ।  
उ॒त्तर॑त ए॒वोप॑वीय निर्व॑पेत् । उ॒भये॑ हि दे॒वाश्च पि॒तर॑श्चे॒ज्यन्ते॑ ॥  
अथो॑ यदे॒व द॑क्षि॒णार्धे॑ऽधि श्रय॑ति । तेन॑ दक्षि॒णावृ॑त् ।  
सो॒माय॑ पि॒तृम॑ते पु॒रोडा॑श ष॒ट्क॑पालं निर्व॑पति ।  
सँ॒व॒त्स॒रो वै सो॑मः पि॒तृमा॑न् ॥ 76

**T.B.1-6-8-3**

सँ॒व॒त्स॒रमे॒व प्री॑णाति । पि॒तृभ्यो॑ बर्॒हिष॑द्भ्यो धा॒नाः ।  
मा॒सा वै पि॒तरो॑ बर्॒हिष॑द । मा॒साने॒व प्री॑णाति ।

यस्मिन्वा ऋ॒तौ पु॒रुषः प्र॒मीय॑ते । सोऽ॒स्यामु॒ष्मिन् लो॒के भ॑वति ।  
ब॒हुरू॒पा धा॒ना भ॑वन्ति । अ॒हो॒रा॒त्राणा॑-म॒भिजि॑त्यै । पि॒तृभ्यो॑  
ऽग्नि॒ष्वात् ते॒भ्यो म॒न्थं । अ॒र्द्धमा॒सा वै पि॒तरो॑ऽग्नि॒ष्वात्ताः ॥ 77

**T.B.1-6-8-4**

अ॒र्द्धमा॒साने॒व प्री॑णाति । अ॒भिवा॒न्यायै॑ दु॒ग्धे भ॑वति ।  
सा हि पि॒तृदे॒वत्यं॑ दु॒हे । यत् पू॒र्णं । तन् म॑नु॒ष्याणां॑ ।  
उ॒पर्य॑र्धो दे॒वानां॑ । अ॒र्द्धः पि॒तृणां॑ । अ॒र्द्ध उ॒पम॑न्थति ।  
अ॒र्धो हि पि॒तृणां॑ । ए॒कयो॑पमन्थति ॥ 78

**T.B.1-6-8-5**

एका॒ हि पि॒तृणां॑ । द॒क्षिणो॑पमन्थति । द॒क्षिणा॑वृद्धि पि॒तृणां॑ ।  
अ॒ना॒र॒भ्योप॑मन्थति । तद्धि पि॒तृन् ग॑च्छति । इ॒मां दि॒शं वे॒दिमु॑द्धन्ति ।  
उ॒भये॒ हि दे॒वाश्च पि॒तरश्चे॒ज्यन्ते॑ । च॒तुः स॑क्ति भ॑वति ।  
स॒र्वा ह्य॒नु दि॒शः पि॒तरः॑ । अ॒खा॒ता भ॑वति ॥ 79

**T.B.1-6-8-6**

खा॒ता हि दे॒वानां॑ । म॒द्ध्यतो॑ऽग्निराधी॑यते ।  
अ॒न्ततो॑ हि दे॒वानामा॑धी॒यते॑ । वर्॒षी॒यानि॒ध्म इ॒ध्माद् भ॑वति॒ व्यावृ॑त्त्यै ।  
परि॑ श्रयति । अ॒न्तर्हि॑तो॒ हि पि॑तृलो॒को म॑नुष्यलो॒कात् ।  
यत्प॑रुषि दि॒नं । तद् दे॒वानां॑ । यद॒न्तरा॑ । तन् म॑नुष्याणां ॥ 80

**T.B.1-6-8-7**

यथ्स॑मूलं । तत् पि॑तृणां । स॑मूलं ब॒र्हिर्भ॑वति॒ व्यावृ॑त्त्यै ।  
दक्षि॑णा स्तृणाति । दक्षि॑णावृद्धि॒ पि॑तृणां । त्रिः पर्ये॑ति ।  
तृती॑ये वा इ॒तो लो॒के पि॑तरः । ताने॒व प्री॑णाति । त्रिः पुनः॒ पर्ये॑ति ।  
षट्थ॑ संप॒द्यन्ते॑ ॥ 81

**T.B.1-6-8-8**

षड्वा ऋ॒तवः॑ । ऋ॒तूने॒व प्री॑णाति । यत् प्र॑स्तरं॒ यजु॑षा गृह्णी॒यात् ।  
प्र॒मायु॑को॒ यज॑मानः स्यात् । यन्न॑ गृह्णी॒यात् । अ॒नाय॑तनः स्यात् ।  
तूष्णी॑मे॒व न्य॑स्येत् । न प्र॒मायु॑को॒ भव॑ति । ना॒नाय॑तनः ।  
यत् त्रीन् परि॒धीन् परि॑दध्यात् ॥ 82



**T.B.1-6-8-9**

मृ॒त्युना॑ यज॒मानं॑ परि॑ गृह्णीयात् । यन्न॑ परि॑ द॒ध्यात् ।  
रक्षा॑ँसि य॒ज्ञँ ह॒न्युः । द्वौ परि॑धी परि॑दधाति ।  
रक्ष॑सामप॒हत्यै॑ । अथो॑ मृ॒त्योरे॒व यज॒मान-मु॒त्सृज॑ति ।  
यत् त्री॑णि त्री॑णि ह॒वीँष्यु॑दा॒हरे॑युः । त्रय॑स्त्रय॑ एषाँ॑ सा॒कं प्र॑मीयेरन् ।  
एकै॑क-म॒नूची॑नान्यु॒दाहर॑न्ति । एकै॑क ए॒वैषा॑-म॒न्वञ्चः॑ प्र॑मीयते ( ) ।  
क॒शिपु॑ कशिप॒व्याय॑ । उ॒प॒ब॒र्हण॑-मु॒प॒ब॒र्ह॒ण्याय॑ ।  
आञ्ज॑न-माञ्ज॒न्याय॑ । अ॒भ्यञ्ज॑न-म॒भ्यञ्ज॒न्याय॑ ।  
यथा॑भा॒गमे॒वैनान्॑ प्रीणाति ॥ 83 (नि॒र॒व॒द॒य॒ते - पि॒तृ॒मा॒न-ग्नि॒ष्वा॒त्ता-  
एक॑यो॒प॒म॒न्थ - त्य॑खा॒ता भ॑वति - म॒नु॒ष्या॑णां - प॒द्य॒न्ते - परि॑द॒ध्यान्  
- मी॑यते॒ पञ्च॑ च )

## 18 अग्नये देवेभ्यः

### T.B.1-6-9-1

अ॒ग्नये॑ दे॒वेभ्यः॑ पि॒तृभ्यः॑ समि॒ध्यमा॑ना-या॒नुब्रू॑हीत्याह ।  
उ॒भये॑ हि दे॒वाश्च पि॒तरश्चे॒ज्यन्ते॑ । ए॒काम॒न्वाह॑ । ए॒का हि पि॑तृ॒णां ।  
त्रि॒रन्वा॑ह । त्रि॒र्हि दे॒वानां॑ । आ॒घारा॑वा॒धारय॑ति । य॒ज्ञप॒रुषो॑-र॒नन्तरि॑त्यै ।  
ना॒र्षेयं॑ वृ॒णीते॑ । न हो॒तारं॑ ॥ 84

### T.B.1-6-9-2

यदा॒र्षेयं॑ वृ॒णीत॑ । यद्धो॒तारं॑ । प्र॒मायु॑को यज॒मानः॑ स्यात् ।  
प्र॒मायु॑को हो॒ता । तस्मान्न॑ वृ॒णीते॑ । यज॒मानस्य॑ हो॒तु गो॑पी॒थाय॑ ।  
अप॑र्ब॒र्हिषः॑ प्र॒याजान्॑ यजति । प्र॒जा वै ब॒र्हिः ।  
प्र॒जा ए॒व मृ॒त्यो॒रुत्सृ॑जति । आ॒ज्यभा॑गौ यजति ॥ 85

### T.B.1-6-9-3

य॒ज्ञस्यै॒व चक्षु॑षी॒ नान्तरे॑ति । प्रा॒चीना॒वीती॒ सोमं॑ यजति ।  
पि॒तृदे॒वत्या॑ हि । ए॒षाऽऽहु॑तिः । पञ्च॒कृत्वो॑ ऽव॒द्यति॑ ।  
पञ्च॒ हो॒ता दे॒वताः॑ । द्वे पु॒रोऽनु॑वा॒क्ये ।

या॒ज्या॒ दे॒वता॒ व॒षट्कारः॑ ।

ता ए॒व प्री॑णाति । स॒न्तत॑मव॒द्यति॑ ॥ 86

**T.B.1-6-9-4**

ऋ॒तूना॑ꣳ स॒न्तत्यै॑ । प्रै॒वैभ्यः॑ पूर्॒वया॑ पु॒रोऽनु॑वा॒क्यया॑ऽऽह ।

प्र॒णय॑ति द्वि॒तीयया॑ । ग॒मय॑ति या॒ज्यया॑ । तृ॒तीये॒ वा इ॒तो लो॒के पि॒तरः॑ ।

अ॒ह ए॒वैनां॑ पूर्॒वया॑ पु॒रोऽनु॑वा॒क्यया॑ ऽत्या॒नय॑ति ।

रा॒त्रियै॑ द्वि॒तीयया॑ । ऐ॒वैना॑न् या॒ज्यया॑ ग॒मय॑ति ।

दक्षि॑णतो॒ऽवदा॑य । उद॒ङ्गति॑क्राम॒ति व्या॑वृ॒त्यै ॥ 87

**T.B.1-6-9-5**

आ स्व॒धेत्या॑श्रावयति । अस्तु स्व॒धेति॑ प्र॒त्याश्रा॑वयति ।

स्व॒धा नम॑ इति॒ वषट्क॑रोति । स्व॒धाका॑रो हि पि॒तृणां॑ ।

सोम॑म॒ग्रे य॑जति । सोम॑प्रयाजा हि पि॒तरः॑ ।

सोमं॑ पि॒तृम॑न्तं य॒जति॑ । सँ॒वथ्स॑रो वै सोमः॑ पि॒तृमान्॑ ।

सँ॒वथ्स॑रमे॒व तद् य॑जति । पि॒तृन् बर्हि॑षदो॒ यज॑ति ॥ 88

**T.B. 1-6-9-6**

ये॒ वै य॒ज्वानः॑ । ते॒ पि॒त॒रो॑ ब॒र्हि॒षदः॑ । ता॒ने॒व तद् य॑जति ।  
पि॒तृ॒न॒ग्नि॒ष्वात्ता॑न् यजति । ये॒ वा अ॒य॒ज्वानो॑ गृ॒हमे॒धिनः॑ ।  
ते॒ पि॒त॒रो॑ऽग्नि॒ष्वात्ताः॑ । ता॒ने॒व तद् य॑जति ।  
अ॒ग्निं क॒व्य॒वा॒हनं॑ य॒जति॑ ।  
य ए॒व पि॒तृ॒णाम॒ग्निः॑ । तमे॒व तद् य॑जति ॥ 89

**T.B. 1-6-9-7**

अथो॒ यथा॒ऽग्नि॑ऽस्वि॒ष्टकृतं॑ य॒जति॑ । ता॒दृ॒गे॒व तत् ।  
ए॒तत्ते॑ त॒त ये॒ च त्वा॒मन्वि॑ति॒ तिसृ॑षु स॒क्तीषु॑ नि॒दधा॑ति ।  
तस्मा॒दा॒तृ॒तीया॒त् पु॒रुषा॒न्नाम॑ न गृ॒ह्णन्ति॑ ।  
ए॒ता॒वन्तो॑ ही॒ज्यन्ते॑ । अत्र॑ पि॒त॒रो यथा॒भा॒गं म॑न्द॒ध्वमि॒त्याह॑ ।  
ह्री॒का हि पि॒तरः॑ । उ॒द॒ञ्चो॑ निष्क्रामन्ति ।  
ए॒षा वै म॑नु॒ष्याणां॑ दिक् । स्वा॒मे॒व तदि॑श॒मनु॑ निष्क्रामन्ति ॥ 90

**T.B.1-6-9-8**

आ॒ह॒व॒नी॒य-मु॒प॒ति॒ष्ठ॒न्ते । न्ये॒वा॒स्मै तद्ध॒नु॒व॒ते ।  
य॒थ् स॒त्या॒ह॒व॒नी॒ये॑ । अ॒था॒न्य॒त्र च॒र॒न्ति ।  
आ॒त॒मि॒तो-रु॒प॒ति॒ष्ठ॒न्ते । अ॒ग्नि॒मे॒वो॒प॒द्र॒ष्टा॒रं कृ॒त्वा ।  
पि॒तृ॒न् नि॒र॒व॒द॒य॒न्ते । अ॒न्तं वा ए॒ते प्रा॒णा॒नां ग॒च्छ॒न्ति ।  
य आ॒त॒मि॒तो-रु॒प॒ति॒ष्ठ॒न्ते । सु॒सं॒दृ॒शं त्वा व॒य॒मि॒त्या॒ह ॥ 91

**T.B.1-6-9-9**

प्रा॒णो वै सु॒सं॒दृ॒क् । प्रा॒ण॒मे॒वा॒त्म॒न् द॒ध॒ते ।  
यो॒जा॒न्वि॒न्द्र ते ह॒री इ॒त्या॒ह । प्रा॒ण॒मे॒व पु॒न॒र॒यु॒क्त ।  
अक्ष॒न्न॒मी॒म॒द॒न्त॒ ही॒ति॒ गा॒र्ह॒प॒त्य-मु॒प॒ति॒ष्ठ॒न्ते ।  
अक्ष॒न्न॒मी॒म॒द॒न्ता॒थ त्वो॒प॒ति॒ष्ठाम॒ह इ॒ति॒ वा॒वै॒त॒दा॒ह ।  
अ॒मी॒म॒द॒न्त॒ पि॒तरः॑ सो॒म्या इ॒त्य॒भि प्र॒प॒द्य॒न्ते ।  
अ॒मी॒म॒द॒न्त॒ पि॒त॒रोऽथ॑ त्वाऽभि प्र॒प॒द्या॒म॒ह इ॒ति॒ वा॒वै॒त॒दा॒ह ।  
अ॒पः परि॒षि॒ञ्च॒ति । मा॒र्ज॒य॒त्ये॒वै॒ना॒न् ॥ 92

**T.B.1-6-9-10**

अथो॑ त॒र्पय॑त्ये॒व । तृ॒प्यति॑ प्र॒जया॑ प॒शूभिः॑ ।  
य ए॒वं वै॑द । अप॑ ब॒र्हिषा॑वनू॒याजौ॑ यजति ।  
प्र॒जा वै ब॒र्हिः । प्र॒जा ए॒व मृ॒त्योरु॑त्थ॒सृज॑ति ।  
च॒तुरः॑ प्र॒याजान्॑ यजति । द्वा॒वनू॒याजौ॑ ।  
षट्॑त् संप॒द्यन्ते॑ । षड्॑वा ऋ॒तवः॑ ( ) ॥ 93

**T.B. 1-6-9-11**

ऋ॒तूने॒व प्री॑णाति । न प॒त्न्यन्वा॑स्ते ॥ न सँ॑याजयन्ति ।  
यत् प॒त्न्यन्वा॑सीत । यत्सँ॑याजये॒युः । प्र॒मायु॑का स्यात् ।  
तस्मा॑न्ना॒न्वास्ते॑ ॥ न सँ॑याजयन्ति । प॒त्नियै॑ गो॒पीथा॑य ॥ 94  
( हो॒तार – मा॒ज्यभा॑गौ यजति – स॒न्तत॑मव॒द्यति – व्या॑वृ॒त्त्यै –  
ब॒र्हिष॑दो यजति – तमे॒व तद॑यज – त॒यनु॑ निष्क्राम – न॒त्याहै –  
ना – नृ॒तवो॑ – नव च )

## 19 उ॒श॒न्त॒स्त्वा॒ ह॒वाम॒ह

### T.B.2-6-16-1

उ॒श॒न्त॒स्त्वा॒ ह॒वाम॒ह॒ आ॒ नो॑ अ॒ग्ने॑ सु॒के॒तुना॑ ॥  
त्व॒ञ् सो॑म॒ म॒हे॒ भ॒गं॒ त्व॒ञ् सो॑म॒ प्र॒चि॒कि॒तो॑ म॒नी॒षा ।  
त्व॒या हि॑ नः॒ पि॒तरः॑ सो॒म॒ पूर्वे॑ त्व॒ञ् सो॑म॒ पि॒तृ॒भिः॑ सँ॒वि॒दा॒नः॑ ।  
ब॒र्हि॒षदः॑ पि॒तर॒ आ॒ऽहं॑ पि॒तृन् । उ॒प॒हू॒ताः पि॒तरो॑ऽग्नि॒ष्वा॒त्ताः॑ पि॒तरः॑ ।  
अ॒ग्नि॒ष्वा॒त्ता॒नृ॒तु॒म॒तो॑ ह॒वाम॒हे । न॒रा॒श॒ञ्से॑ सो॒म॒पी॒थं॑ यँ आ॒शुः॑ ।  
ते॒ नो॑ अ॒र्व॒न्तः॑ सु॒ह॒वा॒ भ॒वन्तु॑ । शं॑ नो॑ भ॒वन्तु॑ द्वि॒प॒दे॒ शं च॑तु॒ष्प॒दे॒ ।  
ये॒ अ॒ग्नि॒ष्वा॒त्ता॒ ये॒ऽन॒ग्नि॒ष्वा॒त्ताः॑ ॥ 95

### T.B. 2-6-16-2

अ॒ञ् हो॒मु॒चः॑ पि॒तरः॑ सो॒म्या॑सः । प॒रो॒ऽव॒रो॒ऽमृ॒ता॒सो॑ भ॒वन्तः॑ ।  
अ॒धि॒ब्रु॒वन्तु॑ ते॒ अ॒व॒न्त॒व॒स्मा॒न् । वा॒न्या॑यै दु॒ग्धे॑ जु॒ष॒मा॒णाः॑ क॒रं॒भं॑ ।  
उ॒दी॒रा॒णा॒ अ॒व॒रो॒ प॒रो॒ च॑ । अ॒ग्नि॒ष्वा॒त्ता॒ ऋ॒तु॒भिः॑ सँ॒वि॒दा॒नाः॑ ।  
इ॒न्द्र॒व॒न्तो॑ ह॒वि॒रि॒दं॑ जु॒ष॒न्तां॑ ।

यदग्ने॑ क॒व्य॒वा॒ह॒न॒ त्वम॑ग्न ई॒डि॒तो॒ जा॒त॒वे॒दः॑ । मा॒त॒ली॒ क॒व्यैः॑ ।  
ये ता॑तृ॒पु॒र्दे॒व॒त्रा जे॑ह॒मा॒नाः ( ) । हो॒त्रा॒वृ॒धः स्तो॑म॒त॒ष्टा॒सो अ॒र्कैः॑ ।  
आ॒ग्ने॑ या॒हि सु॒वि॒द॒त्रे॒भि॒र॒वा॒ङ् । स॒त्यैः॑ क॒व्यैः॑ पि॒तृ॒भि॒र्घ॒र्म॒स॒द्भिः॑ ।  
ह॒व्य॒वा॒ह॒म॒ज॒रं पु॒रु॒प्रि॒यं । अ॒ग्निं घृ॒ते॒न ह॒वि॒षा स॒प॒र्य॒न् ।  
उपा॑स॒दं क॒व्य॒वा॒हं पि॒तृ॒णां । स नः॑ प्र॒जां वी॒र॒व॒तीं॑ स॒मृ॒ण्व॒तु ॥ 96  
(अ॒न॒ग्नि॒ष्वा॒त्ता – जे॑ह॒मा॒नाः स॒प्त च॑)

## त्रीणाचीकेतं

### 20 अयं वाव यः

#### T.B. 3.11.7.1

अ॒यं वा॑व॒ यः प॒व॒ते॑ । सो॒ऽग्नि॒र्ना॒चि॒के॒तः॑ । स य॑त् प्रा॒ङ् प॒व॒ते॑ ।  
तद॑-स्य॒ शि॒रः॑ । अथ॒ यद् द॑क्षि॒णा । स द॑क्षि॒णः प॒क्षः॑ ।  
अथ॒ यत् प्र॒त्यक्॑ । तत् पु॒च्छं॑ । यदु॒द॒ङ् । स उ॒त्तरः॑ प॒क्षः॑ ॥ 97



**T.B. 3.11.7.2**

अथ यत् सम्वाति । तदस्य समञ्चनं च प्रसारणं च ।  
अथो संपदेवास्य सा । स॒ ह वा अ॒स्मै स कामः प॒द्यते ।  
यत् कामो यजते । योऽग्निं नाचिकेतं चिनुते ।  
य उचैन-मेवं वेद । यो ह वा अग्नेर् नाचिकेत-स्यायतनं  
प्रतिष्ठां वेद । आयतनवान् भवति । गच्छति प्रतिष्ठां ॥ 98

**T.B. 3.11.7.3**

हिरण्यं वा अग्नेर् नाचिकेत-स्यायतनं प्रतिष्ठा । य एवं वेद ।  
आयतनवान् भवति । गच्छति प्रतिष्ठां ।  
यो हवा अग्नेर् नाचिकेतस्य शरीरं वेद ।  
स शरीर एव स्वर्गं लोकमेति । हिरण्यं वा अग्नेर् नाचिकेतस्य  
शरीरं । य एवं वेद । स शरीर एव स्वर्गं लोकमेति ।  
अथो यथा रुक्म उत्-तप्तो भाय्यात् ॥ 99

**T.B. 3.11.7.4**

ए॒वमे॒व स ते॑जसा॒ यश॑सा । अ॒स्मि॒ऽश्च॑ लो॒के-ऽमु॑ष्मि॒ऽश्च॑ भा॒ति ।  
उ॒रवो॑ ह॒ वै ना॒मैते॑ लो॒काः । ये ऽव॑रेणादित्यं ।  
अथ॑ है॒ते वरी॑या॒ऽसो लो॒काः । ये प॑रेणादित्यं ।  
अ॒न्तव॑न्त॒ऽह॒वा ए॒ष क्ष॑य्यं लो॒कं ज॑यति । योऽव॑रेणादित्यं ।  
अथ॑ है॒षो ऽन॑न्त-म॒पार॑-म॒क्षय्यं॑ लो॒कं ज॑यति ।  
यः प॑रेणादित्यं ( ) ॥ 100

**T.B. 3.11.7.5**

अ॒नन्त॑ऽह॒ वा अ॒पार॑-म॒क्षय्यं॑ लो॒कं ज॑यति ।  
यो ऽग्निं॑ नाचि॒केतं॑ चि॒नुते॑ । य उ॒चैन॑-मे॒वं वे॑द ।  
अथो॑ यथा॒ रथे॑ तिष्ठन् पक्ष॑सी पर्या॒वर्त्त॑माने प्रत्यपे॑क्षते ॥  
ए॒व-म॑हो॒रात्रे॑ प्रत्यपे॑क्षते । नास्या॑हो॒रात्रे॑ लो॒कमा॑प्नुतः ॥  
योऽग्निं॑ नाचि॒केतं॑ चि॒नुते॑ । य उ॒चैन॑-मे॒वं वे॑द ॥ 101

(उ॒त्तरः॑ पक्षो - गच्छति॑ प्रति॒ष्ठां - भा॒य्याद् - यः प॑रेणादित्य  
-म॒ष्टौ च॑ )

## 21 उ॒श॒न् ह॒ वै

### T.B. 3.11.8.1

उ॒श॒न् ह॒ वै वा॒ज॒श्र॒व॒सः॑ स॒र्व॒वे॒द॒सं॑ द॒दौ॑ ।  
तस्य॑ ह॒ नचि॑के॒ता नाम॑ पु॒त्र आ॒स ।  
त॒ऽ ह॒ कु॒मा॒र॒ऽ स॒न्तं॑ । दक्षि॑णा॒सु नी॒य॒मा॒ना॒सु श्र॒द्धा॒वि॒वै॒श ।  
स हो॑वाच । तत॑ क॒स्मै मां॑ दा॒स्य॒सीति॑ ।  
द्वि॒तीयं॑ तृ॒तीयं॑ । त॒ऽ ह॒ परी॑त उवाच ।  
मृ॒त्य॒वे॒ त्वा द॒दामी॑ति । त॒ऽ ह॒ स्मो-॒त्थि॑तं वा॒ग॒भि॒व॒द॒ति ॥ 102

### T.B. 3.11.8.2

गौ॒त॒म कु॒मा॒र-मि॑ति । स हो॑वाच । प॒रे॒हि मृ॒त्योर् गृ॒हान् ।  
मृ॒त्य॒वे॒ वै त्वा॒ऽदा॒-मि॑ति । तं वै प्र॒व॒स॒न्तं ग॒न्ता-॒सीति॑ होवाच ।  
तस्य॑ स्म ति॒स्रो रा॒त्री-र॒ना॒श्वा॒न् गृ॒हे व॑सतात् ।  
स यदि॑ त्वा पृ॒च्छेत् । कु॒मा॒र क॒ति रा॒त्री-र॒वा॒त्सी-रि॑ति ।  
ति॒स्र इति॑ प्र॒ति ब्रू॑तात् । किं प्र॒थ॒मा॒ऽ रा॒त्रि-मा॒श॒ना इति॑ ॥ 103

**T.B. 3.11.8.3**

प्र॒जां त॒ इति॑ । किं द्वि॒तीया॒-मि॒ति॑ ।  
प॒शू॒स्त इति॑ । किं त्रि॒तीया॒-मि॒ति॑ ।  
सा॒धु॒कृ॒त्यां त॒ इति॑ । तं वै प्र॒वस॑न्तं जगाम ।  
तस्य॑ ह तिस्रो॑ रा॒त्री-र॒ना॒श्वा॒न् गृ॒ह उ॒वास॑ । त-मा॒गत्य॑ पप्रच्छ ।  
कु॒मा॒र क॒ति रा॒त्री-र॒वा॒त्सी-रि॒ति॑ । ति॒स्र इति॑ प्र॒त्यु॒वाच॑ ॥ 104

**T.B. 3.11.8.4**

किं प्र॒थ॒मा॒ र॒त्रि-मा॒श्ना इति॑ । प्र॒जां त॒ इति॑ ।  
किं द्वि॒तीया॒-मि॒ति॑ । प॒शू॒स्त इति॑ ।  
किं त्रि॒तीया॒-मि॒ति॑ । सा॒धु कृ॒त्यां त॒ इति॑ ।  
नम॑स्ते अस्तु भगव॑ इति हो-वाच । वरं॑ वृ॒णी॒ष्वे-ति॑ ।  
पि॒तर॑-मे॒व जी॒व-न्न॒या॒नीति॑ । द्वि॒तीयं॑ वृ॒णी॒ष्वे-ति॑ ॥ 105

**T.B. 3.11.8.5**

इ॒ष्टा॒पूर्त॑योर् मे॒क्षि॒तिं ब्रू॒हीति॑ होवाच ।  
तस्मै॑ है॒तम॑ग्निं नाचि॒के॒त-मु॒वाच॑ ।

ततो॑ वै तस्ये॑-ष्टापूर्ते॑ ना क्षीयेते॑ । नास्ये॑-ष्टापूर्ते॑ क्षीयेते॑ ।  
योऽग्निं॑ नाचिकेतं॑ चिनुते॑ । य उ॑ चैन-मेवं॑ वैद ।  
तृतीयं॑ वृणीष्वे-ति॑ । पुन॑ मृत्योर् मेऽपजितिं॑ ब्रूहीति॑ होवाच ।  
तस्मै॑ हैत-मग्निं॑ नाचिकेत-मुवाच॑ ।  
ततो॑ वै सोप॑ पुनर् मृत्यु-मजयत् ॥ 106

**T.B. 3.11.8.6**

अप॑ पुनर् मृत्युं॑ जयति॑ । योऽग्निं॑ नाचिकेतं॑ चिनुते॑ ।  
य उ॑ चैन-मेवं॑ वैद । प्रजापति॑ वै प्रजाकाम-स्तपो॑ ऽतप्यत ।  
स हिरण्य-मुदास्यत्॑ । त-दग्नौ॑ प्रास्यत् । त-दस्मै॑ नाच्छदयत् ।  
तद् द्वितीयं॑ प्रास्यत् । त-दस्मै॑ नैवाच्छदयत् ।  
तत् तृतीयं॑ प्रास्यत् ॥ 107

**T.B. 3.11.8.7**

त-दस्मै॑ नैवाच्छदयत् । त-दात्म-न्नेव॑ हृदय्ये॑ऽग्नौ॑ वैश्वानरे॑ प्रास्यत् ।  
त-दस्मा॑ अच्छदयत् । तस्माद्दधिरण्यं॑ कनिष्ठं॑ धनानां॑ ।  
भुञ्जत् प्रियतमं॑ । हृदयज॑ हि । स वै तमेव॑ नाविन्दत् ।

यस्मै॑ तां॑ दक्षि॑णा-म॑नेष्यत् । ता॑ꣳ स्वा॒यै॒व ह॑स्ताय॑ दक्षि॑णायानयत् ।  
तां॑ प्रत्य॑गृह्णात् ॥ 108

**T.B. 3.11.8.8**

दक्षाय॑ त्वा दक्षि॑णां प्रति॑गृह्णामीति॑ । सो॑ ऽदक्ष॑त दक्षि॑णां प्रति॑गृह्य ।  
दक्ष॑ते ह॒ वै दक्षि॑णां प्रति॑गृह्य । य॒ एवं॑ वैद॑ ।  
एत॑द्ध स्म॒ वै तद् वि॒द्वाꣳसो॑ वाज॑श्रवसा॒ गोत॑माः ।  
अप्य॑नूदे॒श्यां दक्षि॑णां प्रति॑गृह्णन्ति ।  
उभ॑येन॒ वयं॑ दक्षि॑ष्यामह॒ एव॑ दक्षि॑णां प्रति॑गृह्येति॑ ।  
तेऽदक्ष॑न्त दक्षि॑णां प्रति॑गृह्य । दक्ष॑ते ह॒ वै दक्षि॑णां प्रति॑गृह्य ।  
य॒ एवं॑ वैद॑ ( ) । प्र॒ हान्यं॑ व्ली॑नाति ॥ 109

(वद॑ - त्या॒शना॒ इ - त्यु॑वाच - द्वि॒तीयं॑ वृ॒णीष्वे॑ - त्यज॑यत् -  
तृ॒तीयं॑ प्रा॒स्यत् - गृह्णा॑द् - य॒ एवं॑ वैदै॑कं च )

## 22 त॒ हैतमे॑के

### T.B. 3.11.9.1

त॒ हैत॒-मे॑के॒ प॒शु॒ब॒न्ध॒ ऐ॒वो॒-त्त॒र॒वे॒द्यां॑ चि॒न्व॒ते ।  
उ॒त्त॒र॒वे॒दि॒ स॒म्मित॑ ए॒षो॒ऽग्नि॒रिति॑ वद॒न्तः॑ । तन्न॑ त॒था कुर्या॑त् ।  
ए॒त-म॒ग्निं॑ का॒मेन॑ व्य॒र्द्धये॑त् । स ए॒नं॑ का॒मेन॑ व्य॒र्द्धः॑ ।  
का॒मेन॑ व्य॒र्द्धये॑त् । सौ॒म्ये वा॒वै-न॑म॒ध्वरे॑ चि॒न्वी॒त ।  
य॒त्र वा॒ भू॒यि॒ष्ठा आ॒हु॒तयो॑ हू॒येर॑न् ।  
ए॒त-म॒ग्निं॑ का॒मेन॑ स॒म॒र्द्धय॑ति । स ए॒नं॑ का॒मेन॑ स॒म॒र्द्धः॑ ॥ 110

### T.B. 3.11.9.2

का॒मेन॑ स॒म॒र्द्धय॑ति । अथ॑ है॒नं पु॒र॒र्षयः॑ ।  
उ॒त्त॒र॒वे॒द्या-मे॒व स॒त्रिय॑-म॒चि॒न्व॒त । ततो॑ वै ते॒ऽवि॒न्दन्त॑ प्र॒जां ।  
अ॒भि स्व॒र्गं लो॒क-म॑ज॒यन् । वि॒न्द॒त ए॒व प्र॒जां ।  
अ॒भि स्व॒र्गं लो॒कं ज॑यति । यो॒ऽग्निं॑ ना॒चि॒के॒तं चि॑नु॒ते ।  
य उ॑ चै॒न-मे॒वं वे॑द । अथ॑ है॒नं वा॒युर् ऋ॒द्धि॒कामः॑ ॥ 111

**T.B. 3.11.9.3**

य॒था न्यु॒प्त-मे॒वोप॑द॒धे । ततो॑ वै स ए॒ता-मृ॒द्धि-मा॑द्ध॒र्नोत् ।  
या-मि॒दं वा॒युर् ऋ॒द्धः । ए॒ता-मृ॒द्धि-मृ॑द्ध॒नोति॑ ।  
या-मि॒दं वा॒युर् ऋ॒द्धः । योऽग्निं॑ नाचि॒केतं॑ चि॒नुते॑ ।  
य उ॑ चैन-मे॒वं वे॒द । अथ॑ है॒नं गो॑ब॒लो वा॒र्ष्णः प॒शुका॑मः ।  
पा॒क्त-मे॒व चि॒क्ये । प॒ञ्च पु॒रस्ता॑त् ॥ 112

**T.B. 3.11.9.4**

प॒ञ्च दक्षि॑णतः । प॒ञ्च प॒श्चात् । प॒ञ्चोत्त॑रतः । ए॒कां म॑द्ध्ये॒ ।  
ततो॑ वै स स॒हस्रं॑ प॒शून् प्रा॒प्नोत् । प्र स॒हस्रं॑ प॒शू-ना॑प्नोति ।  
योऽग्निं॑ नाचि॒केतं॑ चि॒नुते॑ । य उ॑ चैन-मे॒वं वे॒द ।  
अथ॑ है॒नं प्र॒जाप॑तिर् ज्यैष्ठ्य॒कामो॑ यश॒स्कामः॑ प्र॒जन॑नकामः ।  
त्रि॒वृत्-मे॒व चि॒क्ये ॥ 113

**T.B. 3.11.9.5**

स॒प्त पु॒रस्ता॑त् । ति॒स्रो दक्षि॑णतः । स॒प्त प॒श्चात् ।  
ति॒स्र उत्त॑रतः । ए॒कां म॑द्धे॒ । ततो॑ वै स प्र यशो॑ ज्यैष्ठ्य॒-मा॑प्नोत् ।



ए॒तां प्र॒जातिं॑ प्रा॒जाय॑त । या॒मिदं॑ प्र॒जाः प्र॒जाय॑न्ते ।

त्रि॒वृद् वै ज्यै॑ष्ठ्यं॑ । मा॒ता पि॒ता पु॒त्रः ॥ 114

**T.B. 3.11.9.6**

त्रि॒वृत् प्र॒जन॑नं । उ॒प॒स्थो यो॒निर् म॑द्ध्य॒मा ।

प्र य॒शो ज्यै॑ष्ठ्य॒माप्नो॑ति । ए॒तां प्र॒जातिं॑ प्र॒जाय॑ते ।

या॒मिदं॑ प्र॒जाः प्र॒जाय॑न्ते । यो॒ऽग्निं॑ ना॒चिके॑तं चि॒नुते॑ ।

य उ॑ चैन॒मेवं॑ वै॒द । अथ॑ है॒नमि॒न्द्रो ज्यै॑ष्ठ्य॒कामः॑ ।

ऊ॒र्ध्वा ए॒वोप॑द॒धे । ततो॑ वै स ज्यै॑ष्ठ्य॒मगच्छ॑त् ॥ 115

**T.B. 3.11.9.7**

ज्यै॑ष्ठ्यं गच्छति । यो॒ऽग्निं॑ ना॒चिके॑तं चि॒नुते॑ । य उ॑ चैन॒मेवं॑ वै॒द ।

अथ॑ है॒नमसा॑वा॒दित्यः॑ स्व॒र्गकामः॑ । प्रा॒चीरे॒वोप॑द॒धे ।

ततो॑ वै सो॒ऽभि स्व॒र्गं लो॒कम॑जयत् । अ॒भि स्व॒र्गं लो॒कं ज॑यति ।

यो॒ऽग्निं॑ ना॒चिके॑तं चि॒नुते॑ । य उ॑ चैन॒मेवं॑ वै॒द ।

स यदी॒च्छेत् ॥ 116

**T.B. 3.11.9.8**

ते॒जस्वी॑ य॒शस्वी॑ ब्र॒ह्मव॑र्चसी स्या-मि॒ति ।  
 प्रा॒डाहो॑तुर् द्वि॒षण्या-दु॒थ्सर्पे॑त् । ये॒यं प्रा॒गाद् य॒शस्व॑ती ।  
 सा मा प्रो॒र्णोतु॑ । ते॒जसा॑ य॒शसा॑ ब्र॒ह्मव॑र्चसे-ने॒ति ।  
 ते॒जस्-व्ये॑व य॒शस्वी॑ ब्र॒ह्मव॑र्चसी भवति । अथ यदी॒च्छेत् ।  
 भूयि॑ष्ठं मे श्रद्-द॒धीर॑न् । भूयि॑ष्ठा दक्षि॒णा नये॑यु-रि॒ति ।  
 दक्षि॑णासु नीय॒माना॑सु प्रा॒च्येहि॑ प्रा॒च्येही-ति॑ प्रा॒ची जु॑षाणा  
 वे॒त्वाज्य॑स्य स्वा॒हेति॑ सु॒वेणो॑-प॒हत्या॑-हव॒नीये॑ जुहुयात् ॥ 117

**T.B. 3.11.9.9**

भूयि॑ष्ठ-मे॒वास्मै॑ श्रद्-द॒धते॑ । भूयि॑ष्ठा दक्षि॒णा नय॑न्ति ।  
 पु॒रीष-मु॒पधा॑य । चि॒तिक्लृ॑प्तिभि॒-रभि॑मृश्य ।  
 अ॒ग्निं प्र॒णीयो॑प-समा॒धाय॑ । चत॒स्र ए॒ता आ॑हु॒तीर् जु॑होति ।  
 त्वम॑ग्ने रु॒द्र इति॑ शत॒रु॒द्रीय॑स्य रू॒पं ।  
 अ॒ग्ना-वि॑ष्णू इति॑ वसो॒र्धायाः॑ । अ॒न्नप॑त॒ इत्य॑न्न हो॒मः ।  
 स॒प्त ते॑ अ॒ग्ने स॒मिधः॑ स॒प्त जि॒ह्वा इति॑ वि॒श्वप्रीः॑ ( ) ॥ 118

(समृद्ध - ऋद्धिकामः - पुरस्तात् - चिक्वे - पुत्रो - ऽगच्छ -  
दिच्छेत् - जुहुयात् - विश्वप्रीः )

## 23 यां प्रथमामिष्टका

### T.B. 3.11.10.1

यां प्रथमा-मिष्टका-मुपदधाति । इमं तया लोक-मभिजयति ।

अथो या अस्मिन् लोके देवताः ।

तासां सायुज्यं सलोकता-माप्नोति ।

यां द्वितीया-मुपदधाति । अन्तरिक्षं लोकं तया-ऽभिजयति ।

अथो या अन्तरिक्षं लोके देवताः ।

तासां सायुज्यं सलोकता-माप्नोति ।

यां तृतीया-मुपदधाति । अमुं तया लोक-मभिजयति ॥ 119

### T.B. 3.11.10.2

अथो या अमुष्मिन् लोके देवताः ।

तासां सायुज्यं सलोकता-माप्नोति ।

अथो या अमू-रितरा अष्टादश ।

य ए॒वामी॑ उ॒रवश्च॑ व॒रीया॑ऽसश्च लो॒काः । ताने॒व ताभि॑-रभिजयति ।  
 काम॑चा॒रो ह॒ वा अ॒स्यो॒रुषु॑ च व॒रीय॑स्सु च लो॒केषु॑ भवति ।  
 योऽग्निं॑ नाचिकेतं चिनुते । य उ॒ चैन॑-मे॒वं वै॒द ।  
 सम्॒व॒त्सरो॑ वा अ॒ग्निर् नाचिकेतः॑ । तस्य॑ वसन्तः शिरः॑ ॥ 120

**T.B. 3.11.10.3**

ग्री॒ष्मो दक्षि॑णः पक्षः । व॒र्षा उत्त॑रः । शर॑त् पुच्छं॑ ।  
 मा॒साः कर्म॑का॒राः । अ॒हो॒रा॒त्रे श॑तरु॒द्रीयं॑ । पर्जन्यो॑ वसो॒र्धारा॑ ।  
 यथा॑ वै पर्जन्यः सुवृष्टं॑ वृष्ट्वा । प्र॒जाभ्यः॑ सर्वा॒न् कामा॑न्थ्  
 संपू॒रय॑ति । ए॒व-मे॒व स॒ तस्य॑ सर्वा॒न् कामा॑न्थ् संपू॒रय॑ति ।  
 योऽग्निं॑ नाचिकेतं चिनुते ॥ 121

**T.B. 3.11.10.4**

य उ॒ चैन॑-मे॒वं वै॒द । सम्॒व॒त्सरो॑ वा अ॒ग्निर् नाचिकेतः॑ ।  
 तस्य॑ वसन्तः शिरः॑ । ग्री॒ष्मो दक्षि॑णः पक्षः । व॒र्षाः पुच्छं॑ ।  
 शर॑-दुत्तरः पक्षः । हे॒मन्तो॑ मद्ध्यं॑ । पूर्॒वपक्षा॑-श्चितयः ।  
 अ॒पर॒पक्षाः॑ पु॒रीषं॑ । अ॒हो॒रा॒त्राणी॑ष्टकाः ( ) ॥

ए॒ष वा॒व सो॒ऽग्नि॑-र॒ग्निम॑यः पु॒नर्ण॑वः ।

अ॒ग्निम॑यो ह॒ वै पु॒नर्ण॑वो भू॒त्वा । स्व॒र्गं लो॒क-मे॑ति ।

आ॒दि॒त्यस्य॑ सा॒युज्यं॑ । यो॒ऽग्निं॑ ना॒चिके॑तं चि॒नुते॑ ।

य॒ उ॒ चैन॑-मे॒वं वै॑द ॥ 122

(अ॒मुं तया॑ लो॒कम॑भिज॒यति॑ - शि॒रः - चि॒नुत॑ - इ॒ष्टकाः॑ षट्च॑ )

## 24 ऋचां प्राची

**(TB 3.12.9.1)**

ऋ॒चां प्रा॒ची॒ मह॑ती दि॒गुच्य॑ते । दक्षि॑णा-माहु॒र्-यजु॑षा-मपा॒रां ।  
अथ॑र्वणा-म॒ण्डिर॑सां प्र॒तीची॑ । साम्ना॑-मुदी॒ची मह॑ती दि॒गुच्य॑ते ।  
ऋग्भिः॑ पूर्वा॒ह्ने दि॒वि दे॒व ई॑यते । यजु॑र्वेदे तिष्ठति म॒द्ध्ये अ॒हः ।  
साम॑वेदे-नास्तमये म॒हीय॑ते । वेदै॑-र॒शून्य॑-स्त्रिभि॑रेति सूर्यः॑ ।  
ऋग्भ्यो॑ जा॒ताः सर्व॑शो मूर्ति॑-माहुः॑ ।  
सर्वा॑ गति॒र्-याजु॑षी है॒व श॑श्चत् ॥ 123

**(TB 3.12.9.2)**

सर्वं॑ तेज॒स्साम॑रूप्यं॒ ह श॑श्चत् ।  
सर्वं॑ हे॒दं ब्र॑ह्मणा है॒व सृ॑ष्टं ॥  
ऋग्भ्यो॑ जा॒तं वै॒श्यं वर्ण॑-माहुः॑ । यजु॑र्वेदं क्षत्रि॒यस्या॑-हुर्यो॒निं ।  
साम॑वेदो ब्रा॒ह्मणा॑नां प्र॒सूतिः॑ । पूर्वे॑ पूर्वे॒भ्यो वच॑ ए॒त-दू॑चुः ।  
आ॒दर्श॑-म॒ग्निं चि॑न्वा॒नाः । पूर्वे॑ वि॒श्व सृ॑जोऽमृ॒ताः ।  
श॒तं वर्॑ष॒ सह॑स्राणि । दी॒क्षिता॑ स्स॒त्र-मा॑सत ॥ 124

**(TB 3.12.9.3)**

तप॑ आसीद् गृ॒हपतिः॑ । ब्र॒ह्म ब्र॒ह्मा भव॑त् स्वयं॑ ।  
सत्य॑ह॒ हो तैषा॑-मासीत् । यद् विश्व॑सृज॒ आस॑त ॥  
अमृत॑-मेभ्य॑ उदगायत् । सहस्रं॑ परिव॑त्सरान् ।  
भूत॑ह॒ प्रस्तो॑-तैषा॑-मासीत् । भवि॑ष्यत् प्रति॑ चाहरत् ।  
प्रा॒णो अ॒ध्वर्यु॑-रभवत् । इ॒दं सर्वं॑ सि॒षास॑तां ॥ 125

**(TB 3.12.9.4)**

अपा॑नो वि॒द्वा-ना॒वृतः॑ । प्रति॑ प्रा॒तिष्ठ॑-द॒ध्वरे॑ । आ॒र्त्तवा॑ उपगा॒तारः॑ ।  
सद॑स्या ऋ॒तवो॑-ऽभवन् । अ॒र्द्धमा॑साश्च मा॒साश्च॑ ।  
चम॑सा-द॒ध्वर्यवो॑ ऽभवन् । अश॑ं स॒द् ब्र॒ह्मण॑-स्तेजः॑ ।  
अ॒च्छा वा॒कोऽभव॑द्-यशः॑ । ऋ॒त-मैषां॑ प्र॒शास्ता॑-ऽऽसीत् ।  
यद् विश्व॑ सृज॒ आस॑त ॥ 126

**(TB 3.12.9.5)**

ऊ॒र्ग-रा॒जान॑-मुद॒वह॑त् । ध्रु॒व गो॒प स्स॒हो-ऽभव॑त् ।  
ओ॒जोऽभ्य॑ष्टौद् ग्राव्.ण्णः॑ । यद् विश्व॑ सृज॒ आस॑त ।  
अप॑चितिः पो॒त्रीया॑-मयजत् । ने॒ष्ट्रीया॑-मयजत् त्वि॒षिः॑ ।

आग्नी॑द्धाद् वि॒दुषी॑ स॒त्यं । श्र॒द्धा है॒वा यज॑त् स्व॒यं ।

इ॒रा प॒त्नी वि॒श्व सृ॑जां । आ॒कू॒ति-र॒पि॒नडू॒विः ॥ 127

**(TB 3.12.9.6)**

इ॒ध्मꣳ ह॒ क्षु॒च् चै॑-भ्य उ॒ग्रे । तृ॒ष्णा चा॑ व॒हता॑मु॒भे ।

वा॒गेषाꣳ सु॒ब्रह्म॑ण्या-ऽऽ\*सी॒त् । छ॒न्दो यो॒गान् वि॒जान॑ती ।

क॒ल्प॒तन्त्रा॑णि त॒न्वा॒ना ऽहः॑ । सꣳ स्था॑श्च॒ सर्व॑शः ॥

अ॒हो॒रा॒त्रे प॑शु॒ पाल्यौ॑ । मु॒हूर्ताः प्रे॑ष्या॒ अभ॑वन् ।

मृ॒त्युस्त॑द-भ॒व-द्वा॑ता । श॒मि॒तो-ग्नो॑ वि॒शां प॑तिः ॥ 128

**(TB 3.12.9.7)**

वि॒श्वसृ॑जः प्रथ॒मा स्स॑त्र-मा॒सत॑ । स॒हस्र॑ समं प्र॒सुते॑न॒ यन्तः॑ ।

ततो॑ ह जज्ञे॒ भुव॑नस्य गो॒पाः । हि॒र॒ण्म॒य इ॒शकु॑निर् ब्रह्म॒ नाम॑ ।

येन॑ सूर्य-स्त॒पति॑ ते॒जसे॑द्धः । पि॒ता पु॒त्रेण॑ पि॒तृमा॑न् यो॒नियो॑नौ ।

नावे॑दविन् म॒नुते॑ तं बृ॒हन्तं॑ । सर्वा॑नु॒भु-मा॑त्मानꣳ संप॒राये॑ ॥

एष॑ नित्यो॒ महि॑मा ब्रा॒ह्मण॑स्य । न क॒र्मणा॑ वर्द्ध॒ते नो॑ कनी॒यान् ॥ 129



**(TB 3.12.9.8)**

तस्यै॒वा-॒त्मा॒ प॒द॒वि॒त्तं॑ वि॒दि॒त्वा । न क॒र्म॒णा॑ लि॒प्य॒ते पा॒प॒के॒न ।  
पञ्च॑ प॒श्चा॒श॒त-॒स्त्रि॒वृ॒त॒ स्स॒म्॒व॒त्स॒राः । पञ्च॑ पञ्चा॒श॒तः पञ्च॑द॒शाः ।  
पञ्च॑ पञ्चा॒श॒त॒ स्स॒प्त॒द॒शाः । पञ्च॑ पञ्चा॒श॒त॒ ए॒क॒वि॒ं॒शाः ।  
वि॒श्व॒सृ॒जाँ॑ स॒ह॒स्रं॑ स॒म्॒व॒त्स॒रं । ए॒ते॒न॒ वै वि॒श्व॒सृ॒ज॒ इ॒दं वि॒श्व-  
म॒सृ॒ज॒न्त॑ । यद् वि॒श्व-॒म॒सृ॒ज॒न्त॑ । तस्मा॑द् वि॒श्व॒सृ॒जः ( ) ॥  
वि॒श्व-॒मे॒ना-॒न॒नु॒ प्र॒जा॒य॒ते । ब्र॒ह्म॒ण॒ स्सा॒यु॒ज्यँ॑ स॒लो॒क॒तां॑ य॒न्ति॑ ।  
ए॒ता॒सा॒मे॒व दे॒व॒ता॒नाँ॑ सा॒यु॒ज्यं॑ । सा॒र्ष्टि॒ताँ॑ स॒मा॒न॒ लो॒क॒तां॑ य॒न्ति॑ ।  
य ए॒त-॒दु॒प॒य॒न्ति॑ । ये चै॒न॒त् प्रा॒हुः । येभ्य॑-॒श्चै॒न॒त् प्रा॒हुः ॥ ओं ॥ 130  
(श॒श्व - दा॒स॒त - सि॒षा॒स॒ता - मा॒स॒त - ह॒वि॒ष् - प॒तिः -  
क॒नी॒या॒न् - तस्मा॑द् वि॒श्व॒सृ॒जो॒ ऽष्टौ॑ च )  
॥ ह॒रिः॑ ओं ॥

-----अभिश्चवणमन्त्र पाठ स्समाप्तः-----

---

**“Chain” indicating starting “padam” of all the “Chapteres”  
in Abisravanam.**

सहस्र॑शीर्षा- मद्भ्यः॑-सहस्र॑शीर्ष- मृतं॑-कृणु॑ष्व -  
रक्षो॑हणः-सोमा॑यो-शन्त॑स्त्वा-भक्षे॑हि-ध्रु॒वा - ऽस्य॑ग्न उदधे॑ -  
शिरो॑-ऽसावा॑दित्य- संत॑ति-रकवि॑ञ्श-  
इन्द्रो॑-वैश्वदे॑वेना- ऽग्नय॑-उशन्त॑स्त्वा-य-मु॒शन् ह-  
तञ् ह - यां प्रथ॑मा-मृ॒चां प्राची॑ चतु॑ विञ्शतिः॑ ॥

-----

**Begining and ending “padam” of Abisravanam.**

सहस्र॑शीर्षा पु॒रुष - ओं ॥

-----